

**Bádha Ngali
gba Yesu Kilisito maka li
Maloko
aye lie ko
Eli na kalanu**

Bádha Ngali maka li Maloko aye lie-e, akpo lita e ne naziba me Bádha Ngali ango-o a ko na Yesu Kilisito , Ndili gba Ebhe. Ani asuno Yesu maka kpála na kulu di na angu. Angu gba ani ngau lie bhú nasuno gba ani, ne bhú angu gba ani pi si siti bua di ne bhú nambu li osisiti 'ngú gba okpála. Yesu ngakpokpo 'ngú gba e makpe maka Ndili gba kpála inde ago ngú naha mukobho gba e ngubula nagbegbe okpála bhú sisiti 'ngú gba o-o.

Maloko akpokpo 'ngú gba Yesu-o mbámhá, ani agama 'ngú naali píndji kulu li Yesu amene e ane bhende li Yesu akpokpo e di ne bhende ani asuno e-o. La-a, li omakpata gba Yesu adu la lie abhue ne ani bhú dabili bini-e, u atsia ambila ani ndjindji. Engú bini, obhulá yala gba ani adu matá akolo pi ani ne siti bua naali.

Olukuluku (9-20) inde u a aye e sùnda oehe bhisi me-e, ngau lie me aye ne kpála koko. Maloko ye ngae de.

Ongbengbe ongú inde bhú bhuku inde-e ngae inde:

Lita Bádha Ngali-o *1:1-13*

Kulu li Yesu amene e bhú ká okpála abhú Galilaya *1:14 - 9:50*

Dhukù gba Yesu nayie bhú Galilaya ngú nanù
 abhú Yelusalema 10:1-52
 Oekpí nasoso gba Yesu abhú Yelusalema 11:1 -
 15:47
 Nazuku gba Yesu 16:1-8
 Nakoto ka Yesu li okpála, ne na'ù ka ani abhúlá
 16:9-20

*Djaa bhùlù nabatisa okpála aleke kpadji pi
 Ngámá Yesu*
*(Tsia bhú Mat. 3:1-12; ne bhú Luk. 3:1-18; di
 ne bhú Dja. 1:19-28.)*

¹ A inde-e lita Bádha Ngali gba Yesu Kilisito ,
 Ndili gba Ebhe-o. ² Maka li polofeta Isaya aye lie
 bhú bhuku gba e me:

«Ebhe apa me: Djedje nga! Ma atíma bhùlù
 titima gba ma-a pi mù kalanù
 ngùbula naleke kpadji pi mù.

³ Kpála ango-o ngatotobhila abhú mili bili me:
 <Yi leke kpadji pi Ngámá!

Yi lili odjedje kpadji pi ani má ngbuu ngbuu!†>>

⁴ Kaka-a, Djaa bhùlù nabatisa okpála akoto
 nani abhú mili bili. Ani adù a'i okpála me u go
 sia batisimo ngú nasuno me u adji bua o adji,
 amba Ebhe 'e siti 'ngú gba uo-o. ⁵ Abhomù-o,
 ndù okpála hana na ndu doto na Yudaya, di ne
 ndù okpála hana na gùdhù na Yelusalema adù
 ago abhaka ani. U adù ambamba ta osisiti 'ngú
 gba o-o kala ndù okpála hana. Djaa atsia adù
 abatisa uo bhú ngade 'ngu na Djùlùdani. ⁶ Djaa
 adù adyi bongo inde u adù e li su enù u a'i e me

† 1:3 1:2-3 Tsia bhú Mal. 3:1; di ne bhú Isa. 40:3.

«samo.» Aní adu agbite ludu e ne ekpú na kó 'nu. Aní adu azu omakindolo di ne nadha 'mu eú. ⁷ Aní atsia adu apa pi uo me: «Kpála bini ngago pita ma. Kpála ango-o ane ma ne angu. Ma ne tetele kpála ade ngubula me ma kita ne kuto ngubula me ma bhulu ekpú na malokò gba aní-o. ⁸ Ngama-a, ma ngabatisa yi ne engu. Engú bini, ngaani-e, aní abátisa yi ne Bu Bhobua .»

Djaa abatisa Yesu

(Tsia bhú Mat. 3:13; di ne bhú Luk. 3:21-22.)

⁹ Bhú okpí bhomu-o, Yesu ayie bhú Nadjaleta, gudhu bini na ndu doto na Galilaya, Djaa atsia abatisa aní bhú ngade 'ngu na Djuludani. ¹⁰ Nedhinga li Yesu adu akoto lie bhú 'ngu-o, aní au kokpí ngada bhusu e. Aní atsia au di Bu Bhobua ngakò pí e maka bøbho. ¹¹ Abhomu-o, eli bini akoto abhúla, atsia apa me: «Mu ne Ndili gba ma inde ma kunda e naali, mu ne kpúkpú na bua ma.»

Satana ale Yesu

(Tsia bhú Mat. 4:11; di ne bhú Luk. 4:1-13.)

¹² Pipita kolo me-e, Bu Bhobua atsia amba bhúla Yesu abhú mili bili. ¹³ Aní adu oo ngubula ekpí ndjikpa badha me Satana nde ngale aní. Yesu adu nadu li bili li onu na bili adudu li e-o. Oandjelu atsia adu nateteke aní.

Yesu a'i omakpata na gigena

(Tsia bhú Mat. 4:12-22; di ne bhú Luk. 4:14-15, 5:1-11.)

¹⁴ Ekpí bini, pita li Elode Atipasi aholo Djaa lie, aní atsia ato aní bhú tikpu-o, Yesu anu bhú ndu doto na Galilaya. Aní adu akpokpo Bádha

Ngali gba Ebhe-e* pi okpála. Aní adu apa me:
¹⁵ «Nedhinga nani lí Ebhe a'o e akolo. Nau gba
 ani-e akolo di masakpe. Yi dji bua yi, yi bhuka
 Bádha Ngali gba Ebhe-o.»

¹⁶ Lí ani adu akpangba ngo 'kpè na Galilaya lie,
 ani au Simo ne ndai e Andili me u nde ngabhike
 nado bhúbhú. Padhá de, anga u du nani obhulu
 nagbe sungu. ¹⁷ Yesu atsia apa pi uo me: «Yi
 kpata ma, ma adjí ibili yi obhulu nagili okpála pi
 Ebhe.» ¹⁸ Kolo me-e, u a'o ka onado gba o-o, u
 atsia akpata ani.

¹⁹ Pipita-a, Yesu adyudyo mbo lie ne kalanu
 masudha, ani au ongisi gba Djebedayo: Djaki ne
 ndai e Djaa . U adu me u nde bhú zabu gba o, u
 nde ngaleke onado gba o-o. ²⁰ Abhomu-o, ani a'i
 uo. Má gala kolo me-e, u a'o ka 'dyi o, Djebedayo
 bhú zabu bhú dabili bini ne okpála na kulu-o. U
 atsia akpata ani.

*Yesu akobho kpála bini inde lí siti bua adu
 nadu bhú e
 (Tsia bhú Luk. 4:31-37.)*

²¹ Abhomu-o, Yesu ne omukpata gba e akolo
 bhú kuti na Kapalanauma. A akolo lie bhú 'kpí
 naguo gba omaYuda-a , Yesu ali bhú 'ti nadjé líli
 gba Moidje , ani atsia aholo nasuno. ²² Okpála
 inde adu nadjé ani-e, adu nangamba naali lí
 nasuno gba ani-o. Padhá de, anga ani du asuno
 maka omusuno na líli gba Moidje de. Engú bini,
 ani adu asuno ne angu. ²³ A abhaka me bhú

* **1:14** 1:14 Bhú obhuku koko-o mo obháka me u nde aye me
 «Bádha Ngali Nau gba Ebhe .» Tsia bhú Mlk. 6:17.

'ti nadjé líli oo, kpála bini inde lí siti bua adu bhú e nde oo. Abhomu-o, kpála ango-o asula me: ²⁴ «Yesu, kpála na Nadjaleta, mo okunda namene ngú ya pi? Mo ogo ngú nandjia angu ya? Ma mbila hana me mu ne da-ie. Mu ne Kpála na Bubu inde lí Ebhe atima e ko!»

²⁵ Engú bini, Yesu ambe bhú 'ndji siti bua ango-o me: «Gbite 'bhø mu, amba mu koto la di bhú kpála ango-o makoto!» ²⁶ Abhomu-o, siti bua adyiki kpála bhomu-o má djigi djigi! Aní atú 'ue, aní atsia akoto bhú aní. ²⁷ Ndu okpála hana angamba naali. Kaka-a, u aholo nayi lío sunda o me: «A inde-e mangua 'ngú dho? Nasuno na mbia inde-e abedhe ne angu! Kpála inde-e ngaha belegu líli pi osisiti bua, u la bhadi ngamemene!» ²⁸ Abhomu-o, ngali gba Yesu-o ayangba bha kolo bhú ndu doto na Galilaya libhomu.

Yesu akobho okpála bhelé na kuo

(Tsia bhú Mat. 8:14-17; di ne bhú Luk. 4:38-41.)

²⁹ Yesu akoto lie bhú 'ti nadjé líli-e me-e, u atsia anu ne Djaki di ne Djaa bhú 'ti gba Simo ne Andili. ³⁰ A abhaka me 'hi wala Simo nde asi kuto, ka anga adu lí aní ne kuo, kute aní adu kpákpá. Abhomu-o, u atsia apa kolo engú gba aní-e pi Yesu. ³¹ Aní dyudyo lie de aní. Aní aha 'kpa aní, aní a'e aní bhúlá. Kuo ayie lí aní, aní atsia aholo nalú 'zu pi uo.

³² A akolo lie tagolo pita nati ka ela-a, okpála aholo nago ne obhulu kuo di ne obhende adu ne osisiti bua bhú o pi Yesu. ³³ Okpála na gudha libhomu adu apo bhúla o lí 'bhø bhoti-o.

³⁴ Abhomu-o, Yesu akobho okpála bhelé inde adu ne okuo ngangá. Aní atsia apandja di obua na sisiti bhelé inde adu nadu bhú okpála-o. Aní ha la di nedhinga pi osisiti bua ango-o ngú nagama 'ngú belegu de bini. Padhá de, anga a adu me u nde ngambila aní hana.

*Yesu akpokpo Ngali gba Ebhe-e bhú Galilaya
(Tsia bhú Luk. 4:42-44.)*

³⁵ Bhú sikikpi-e, me bití nde aní nga bha má gbu-o, Yesu ayie bhúlá, aní akoto. Aní atsia atapa abhú mili bili. Oo, aní aholo nayo Ebhe. ³⁶ Abhomu-o, Simo ne okpála bhende u adu ne o-o, aholo nagili aní. ³⁷ U au aní lie, do uo pi aní me: «Ndu okpála hana ngagili mu.» ³⁸ Abhomu-o, Yesu atsia apa pi uo me: «Ní nu lí obili koko, bhú okuti na ngongo, amba ma kpokpo di Ngali gba Ebhe-e oo. Padhá de, anga a bhomu-o engú inde ma ago ngú e ko.» ³⁹ Abhomu-o, Yesu adholo nani bhú ndu doto na Galilaya libhomu. Aní atsia adu akpokpo Ngali gba Ebhe-e bhú oti nadjé líli na kuti gba uo-o. Aní adu di napandja osisiti bua inde adu nadu bhú okpála-o.

*Yesu akobho bhulu kába bini
(Tsia bhú Mat. 8:1-4; di ne bhú Luk. 5:12-16.)*

⁴⁰ Bhú oekpi bhomu-o, bhulu kába bini adyudyo lie de Yesu. Aní atutu lipuku e kuto kala aní, aní atsia akikiliki lie pi aní me: «Í du me mu nde akunda-a, mu ti da nakobho ma.» ⁴¹ Yesu adje ndjinga aní, aní a'o 'kpa e lí kute aní. Aní atsia apa pi bhulu kába ango-o me: «Ako, ma akunda. Kokobho!» ⁴² Ma 'li ma me-e,

kába agulú li aní hana má da! Aní atsia akobho. ⁴³ Kolo me-e, Yesu agie aní sidi ne nagbele 'dje aní kpekpeke. ⁴⁴ Aní atsia apa pí aní me: «Djedje! Mo osú 'kpá li 'ngú inde-e de kpála bini belegu de má kpo! Engú bini, nu suno límú pí dimandø gba Ebhe , amba mu ha makiso gba mu-o maka li Moidje aye nani lie-o. Bhobhomu-o asúno pí okpála me mo okobho.» ⁴⁵ La-a, li kpála ango-o ayie lie oo, aní aholo bha ne kpokpo 'ngú bhomu-o pí ndu okpála hana li ndu bili hana inde aní adu apu li e-o. Kaka-a, Yesu ti matá nani da nasuno lie mbámhá bhú gudhu de. Engú bini, aní adu bha ibili nadu ne alingo gudhu, bhú omili bili. Okpála adu ayie ne ndu bili hana, u atsia adu ago nabhaka aní.

2

Yesu akobho dukuto

(Tsia bhú Mat. 9:1-8; di ne bhú Luk. 5:17-26.)

¹ Pita 'kpí masudha-a, Yesu agie lie bhú Kapaalanauma. Okpála atsia adje me aní akuti. ² Abhomu-o, kambí okpála ago apo bhúla o oo. Kaka-a, bili na padhá tsia du de, belegu de ali 'bhø bhoti. Aní atsia adu akpokpo eli gba Ebhe-e pí uo. ³ Bhú nedhinga bhomu-o, obhosi badha ago pí aní ne dukuto bini me u nde abi aní mabi. ⁴ Engú bini, li okpála adu la lie bhelé-e, u tsia ti nani da nakolo ne aní li Yesu de. Abhomu-o, u atsia a'pu ne aní apí 'ngbu 'ti. U adu gudho li 'ngbu 'ti-e li lele bili inde Yesu adu lie-o. U atsia akø dukuto-o pí kalagba gba e tété. ⁵ Li Yesu au

nabhuka gba uo lie, ani atsia apa pi dukuto-o me: «Ndika ma, osisiti 'ngú gba m̄-o a'e lie a'e.»

⁶ Om̄suno na líli koko gba Moidje ad̄u me u nde ad̄ul̄u kuto oo. U atsia ad̄u nabhundja li bua o me: ⁷ «Kpála inde-e ngagama 'ngú mo-o ka ni? Ani ngasobho Ebhe. A ti da na'e siti 'ngú gba kpála da, bha bini Ebhe kpi e kpi di?» ⁸ Yesu atsia ambila bha kolo me u ngabhundja li bua o mo-o. Abhom̄-o, ani atsia apa pi uo me: «Yi ngabhundja li bua yi mo-o ka ni?» ⁹ A ane ne bh̄uk̄u ne bhedho: ne napa pi dukuto-o me «Osisiti 'ngú gba m̄-o a'e lie a'e», ne napa me «Yie bh̄ulá, ha kalagba gba m̄-o, amba m̄u dh̄uk̄u?» ¹⁰ Engú bini, ma adjí asuno pi yi me «Ndili gba kpála ne angu na'e osisiti 'ngú gba okpála na p̄ila doto.» Abhom̄-o, ani atsia apa pi dukuto-o me: ¹¹ «Ma apa pi m̄u me yie bh̄ulá, ha kalagba gba m̄-o, amba m̄u gie lim̄u agba m̄u!» ¹² Kolo me-e, bhoko ango-o ayie bh̄ulá, ani aha kalagba gba e-o, ani akoto bh̄ú ká djila nd̄u okpála hana, ani atsia atapa. Nd̄u okpála hana ad̄u angamba. U ad̄u adh̄oḡe Ebhe. U atsia ad̄u apa me: «Ya u nga ngua engú inde-e beleḡu de bini!»

Yesu a'í Levi

(Tsia bh̄ú Mat. 9:9-13; di ne bh̄ú Luk. 5:27-32.)

¹³ Pipita-a, Yesu an̄u matá lingo ekp̄e na Galilaya. Bhiti okpála ad̄u ago abhaka ani, ani atsia ad̄u asuno pi uo. ¹⁴ Ani ad̄u akodho 'kpí lie, ani au Levi, ndili gba Alafayo me ani nde ad̄u bh̄ú 'ti inde u ad̄u akala mandjandja bh̄ú e-o. Yesu apa pi ani me: «Kpata ma.» Levi

ayie bhúlá, aní atsia akpata aní. ¹⁵ Pipíta-a, Yesu atsia anu nazu 'he bhú 'ti gba aní. Ondombi na mandjandja di ne okpála namene siti 'ngú bhelé adulu de Yesu ne omukpata gba e-o. Padhá de, anga ongua okpála bhomu-o bhelé adu akpata aní. ¹⁶ Li omusuno na líli inde adu bhú ká omuFalisai au lie me Yesu ngazu 'he ne ongua okpála bhomu-o, u atsia ayi omukpata gba ani-e me: «Ani ngazu 'he bhú dabili bini ne ondombi na mandjandja di ne okpála namene siti 'ngú ngú ni?» ¹⁷ Yesu adje uo napa engú bhomu-o lie, aní atsia apa pi uo me: «Okpála inde ne kuo ade-e ne gumu mutia ade. Engú bini, okpála na kuo mangbo ne gumu ani ngao. Ma go ngú na'i okpála bhende apa me o ngbingbili-e de. Engú bini, ma ago mangbo ngú na'i obhende ngau lio me o ne osisiti okpála ko.»

Yesu akpo 'ngú pindji natse 'zu ngú nayo Ebhe (Tsia bhú Mat. 9:14-17; di ne bhú Luk. 5:33-39.)

¹⁸ Ekpí bini, omukpata gba Djaa bhulu nabatisa okpála di ne omuFalisai adu atse 'zu ngú nayo Ebhe. Abhomu-o, okpála ago ayi Yesu me: «Ka ní li omukpata gba mu-o tsetse ezu lie ngú nayo Ebhe de-e, obhende gba Djaa bhulu nabatisa okpála di ne obhende gba omuFalisai-e nde la ngatsetse-e?» ¹⁹ Yesu agie pi uo me: «Yi abhundja naayi me okpála inde ago bhú da anokomia na kuva ti da natse nazu 'he me 'ko elo-o nde bhú dabili bini ne uo? 'Kpi bini de! Nedhinga inde li 'ko elo-o nde nga bha lie bhú dabili bini ne uo-o, u ti da natse nazu 'he de. ²⁰ Engú bini,

ekpí akólo makolo nedhinga inde li u a'é 'ko ɔlɔ-
o lie bhú ká uo-o, ekpí ango-o, u tsia tsé nazɔ 'he.
21 Kpála bini ti da naleke bongo na didili ne pála
bongo na mbia de. I dɔ mo-o de-e, pála bongo
bhe na mbia sídha té bhe na didili-o, li eka ango-
o kólo ngbéngbé ane bhe na kalanɔ-o mane. 22 La
di-e, kpála bini túko pandi na mbia bhú odidili
dhudhu na kó 'nɔ de. I dɔ mo-o de-e, pandi-e
úpa bhusɔ odhudhu-o. Aní tsia néke pandi-e ne
odhudhu-o hana. Engú bini, pandi na mbia ayo
bha ne odhúdhú na mbia.»

*Yesu ne Ngámá pí 'ndji ekpí naguo gba
omaYuda*

(Tsia bhú Mat. 12:1-8; di ne bhú Luk. 6:1-5.)

23 Ekpí bini naguo gba omaYuda-a , Yesu ne
omɔkpata gba e adɔ akodho 'kpí bhú ngu 'zɔ
inde u a'i e me ngano. Omɔkpata gba ani-e
aholo akodho 'ndji 'ndji, u atsia adɔ nazɔzɔ.
24 OmɔFalisai apa pí Yesu me: «Tsia nga engú
u ngamene e li 'kpí naguo-o. Líli gba ní-e ziba
namene kulu bhú 'kpí naguo de.» 25 Aní atsia
gie pí uo me: «Yi tanga nga engú inde li Davidi
amene nani e di? Ekpí bini, ngaani ne okpála
inde adɔ adhukɔ bhú dabili bini ne ani-e adje
gumɔ. 26 Abhomɔ-o, aní alí bhú 'ti Ebhe, aní
atsia azɔ mapa inde u a'o e pí Ebhe-o (a adɔ
me Abiatali nde ne bhele kpála gba odimandɔ li
nedhinga bhomɔ-o ngae). La-a, líli gba ní aziba
me odimandɔ zɔzɔ bha ngao kpi o kpi. Engú
bini, Davidi azɔ, aní atsia aha di pí okpála inde
adɔ adhukɔ bhú dabili bini ne ani-o.» 27 Yesu
atsia apa matá pí uo me: «U a'o ekpí naguo pí

kpála-kuti. Engú la bini, u bho kpála-kuti pi ekpí naguo de. ²⁸ Kaka-a, Ndili gba kpála di ne Ngámá pí 'ndji ekpí naguo.»

3

Yesu akobho bhoko bini li 'kpí naguo gba omaYuda

(Tsia bhú Mat. 12:9-14; di ne bhú Luk. 6:6-11.)

¹ Ekpí koko, Yesu ali matá bhú 'ti nadje líli gba Moidje-o . Bhú 'ti oo, kpála bini inde li 'kpa e andia adu oo. ² Omufalísai adu akunda na'o 'ngú pí Yesu. Kaka-a, u aholo atsia ani ne kpéke djila, atigala ani kóbho kpála inde adu me 'kpa e nde andia-a li 'kpí naguo . ³ Abhomu-o, Yesu atsia apa pi kpála ango-o me: «Yie bhúlá, amba mu lu si bhú ká djila ndu okpála hana.» ⁴ Pipita-a, Yesu atsia ayi okpála inde adu oo me: «Li 'kpí naguo gba omaYuda-a, líli gba ní-e aziba bhedho: U mene bádha 'ngú ne me u mene siti 'ngú? U kobho kpála ne me u bhөлө kpála?» Engú bini, u tsia du ne engú na gigie de! ⁵ Ani aholo atsia ndu uo hana bini ne bini na gúgú. Bua ani ake, ka kpéke 'ndji gba uo-o. Abhomu-o, ani atsia apa pi kpála li 'kpa e andia me: «Gbele 'kpa mu.» Kpála ango-o agbele 'kpa e, 'kpa ani atsia akolo matá ndjindji. ⁶ Li omufalísai aze lie oo, u atsia apo kolo bhúla o ne omaha Elode .^{*} U atsia adje lío me ogili kpadji nabhөлө Yesu.

Kambi okpála akpata Yesu

^{*} **3:6** 3:6 Okpála gba Elode: A ko okpála inde adú bhú dabili bini ne Elode. Tsia bhú Mat 22:16.

⁷ Pipita-a, Yesu ne omukpata gba e agbida lingo ekpø na Galilaya. Kambi okpála atsia akpata ani. Okpála ango-o ayie nani bhú ndu doto na Galilaya ne Yudaya, ⁸ bhú gũdhũ na Yelusalema, bhú ndu doto na Idumé, bhú ndu doto inde ayi 'ngu na Djuladani, bhú odoto na Tile ne Sidona. Kambi okpála ango-o adje nani ngali na ongú li Yesu adũ amene e lie, u atsia ago abhaka ani. ⁹ Yesu atsia aha líli pí omukpata gba e me u 'o zabũ pí ní bini masakpe, amba i dũ me okpála bhomũ-o nde asulũ ní má wakaka-a, ní de 'u bhúbhú. ¹⁰ Padhá de, anga ani akobho nani okpála bhelé. Kaka-a, okpála na kuo adũ agbene lio me o bu 'kpa o li ani amba o kobho. ¹¹ Li okpála inde li osisiti bua adũ ato mbolo li o adũ au ani lie, u adũ ago atuko ne 'ue bhú li 'dhũ ani me: «Mũ ne Ndili gba Ebhe.» ¹² Engú bini, Yesu adũ apa pí uo na gúgú me u ambámba ta ní pí okpála koko de.

Yesu alo obhũlũ titima ndjikpa ne ká bhisi

(Tsia bhú Mat. 10:1-4; di ne bhú Luk. 6:12-16.)

¹³ Pipita-a, Yesu a'ũ apí 'ta. Ani atsia a'i obhende ani adũ akũnda o-o. U atsia ago abhaka ani. ¹⁴ Abhomũ-o, bhú ká okpála ango-o, ani alo okpála ndjikpa ne ká bhisi. Ani agisila 'li uo me obhũlũ titima . Ani a'o uo ngũbula me ní dũ adú ne uo bhú dabili bini, la di ngũbula me ní tima uo ngú nakpokpo Ngali gba Ebhe-o. ¹⁵ Ani aha di pí uo angu ngú napandja osisiti bua bhú okpála. ¹⁶ A inde-e obhe ndjikpa ne ká bhisi inde ani alo nani o-o: Simo (inde li Yesu agisila nani 'li

e me «Piele»), ¹⁷ Djaki ne ndai e Djaa (ongisi gba Djebedayo inde li Yesu aha nani 'ili koko pi o me «Boaneledjesi», a akunda napa me «ongisi gba mɔgbálá»), ¹⁸ a la di-e, Andili, Filipo, Batelemi, Matié, Tuma, Djaki (ndala Alafayo), Tade, Simo (kpála nakunda doto gba e naali), ¹⁹ di ne Yuda Isikaliote, kpála inde apú Yesu-o.

Okpála na piga gba Yesu abhundja me ani ati pele

²⁰ Abhomu-o, Yesu agie matá lie li bili ani adu nadu li e-o, bhiti okpála atsia ago apo matá bhúla o de ani. Kaka-a, Yesu ne omukpata gba e sia belegu nedhinga ngu nazu 'he de. ²¹ Li okpála na piga gba ani adje ngali ango-o lie, u ake kpadji ngu nanu aholo ani. Padhá de, anga u adu apa me: «Yesu akolo bhulu pele!»

Yesu agie 'ngu pi omusuno na líli gba Moidje (Tsia bhú Mat. 12:22-32; di ne bhú Luk. 11:14-23, 12:10.)

²² Abhomu-o, omusuno na líli gba Moidje inde ayie nani bhú Yelusalema adu apa me: «A bhú kpála bhomu-o ne Beledjebula!» U adu di apa matá me: «A ngaha angu nato holo bhú 'dhu osisiti bua pi ani ne ngamá gba osisiti bua.» ²³ Abhomu-o, Yesu atsia a'i omusuno bhomu-o. Ani atsia apa pi uo bhú gbitaku me: «Lele pi Satana ti da nato holo lie bhú 'dhu Satana-a? ²⁴ I du me okpála gba ngamá bini nde ngagu gbele sunda o, kuti ango-o lú-u de. ²⁵ I du me okpála na piga bini nde ngagu gbele sunda o, piga ango-o lú-u de. ²⁶ I du me Satana nde ngagu lie ngae

makpe, nau gba ani-e gbógbo bhúsu e. Ani ti da nabhue de, li 'ngú gba ani-e ndjía.

²⁷ Kpála ti da nali bhú 'ti gba kpéke bhoko bini de, ani tsia bhá ndu 'he gba ani-e me ani nde gbigbite ngaiza kpéke bhoko bhomu-o kalanu de de. Engú bini, ani de agbigbite ani agbigbite-e, ani tsia bhá ndu 'he gba ani-o. ²⁸ Ma apa pi yi na paká me, u tí da nambu li osisiti 'ngú gba okpála di ne osobho inde u ngasobho Ebhe ne e hana. ²⁹ Engú la bini, li kpála sobho Bu Bhobua-a , Ebhe 'é siti 'ngú gba kpála ango-o de. Padhá de, anga ani amene bhomu-o siti 'ngú na dudu ma. ³⁰ Yesu adu apa nani pi uo mo-o, anga u adu apa me: <A bhú ani ne siti bua.>>

'Hi Yesu ne ondaise Yesu ngao dho

(Tsia bhú Mat. 12:46-50; di ne bhú Luk. 8:19-21.)

³¹ Pipita-a, 'hi Yesu ne ondaise ani akolo li bili ani adu asuno li e-o. U alulu akilidjo, u atsia atima kpála bini ngú na'i ani. ³² Kambi okpála adulu nani de ani. U atsia apa pi ani me: «Tsia nga, 'hi mu di ne ondaise mu alulu akilidjo, u ngagili mu.» ³³ Ani atsia gie pi uo me: «'Hi ma ne ondaise ma ngao dho?» ³⁴ Abhomu-o, ani atsia bhiti okpála asa dengo ani ngbalina-o. Ani atsia apa me: «Yi tsitsia nga, 'hi ma ne ondaise ma ngao inde! ³⁵ Ndu kpála hana inde ngamene engú li Ebhe akunda e, kpála ango-o, a ko ndai ma na bhobhoko, a ko ndai ma na eole, a ko la di 'hi ma.»

4

Gbitaku gba bhulɔ nalu nguwa

(Tsia bhú Mat. 13:1-9; di ne bhú Luk. 8:4-8.)

¹ Lì Yesu akolo lie lingo ekpø na Galilaya-a, anì aholo matá nasuno. Abhomɔ-o, bhiti okpála na bhibhiti ago apo bhúla o de anì. Kaka-a, anì atsia a'ɔ bhú zabu bini, anì anɔ adu bhúbhú apí 'ngu. Bhiti okpála-a atsia adu naao apigo denko 'ngu-o. ² Yesu atsia adu asuno ongu pí uo bhelé bhú ogbitaku. Anì adu apa bhú nasuno gba e me: ³ «Yi djedje nga! Ekpí bini, kpála bini anɔ abhiye gba e ngu nalu 'zɔ. ⁴ Nedhinga anì adu alulu lie, tété abala lingo kpadji. Odhu ago, u atsia azu hana má kpəkəbhø!

⁵ Koko atsia abala li bìli na teme, doto du li bìli ango-o bhelé de. Kaka-a, a atsia akø má gala, anga doto du sasa bhelé de. ⁶ Engú bini, li ela akolo lie kpekepeke-e, ezu ango-o atsia atsulu ka ndibhili sisie-o. Abhomɔ-o, a atsia a'ulu. ⁷ Té koko abala li bìli na oeti, oeti atsia abhele, a anguvo ezu-o. Kaka-a, a atsia li lílí de. ⁸ Lí nguwa koko atsia abala li bìli na dobho, a akø, a abhele a atsia alì lílí. Lí nguwa bini alì lílí ndjikpa bata. Koko alì lílí ndjikpa madhia. Koko alì lílí kámá bini.» ⁹ Yesu atsia abu tata me: «Í du me a nde li kpála ne djedje ngu nadje 'kpí-e, anì de dje!»

Yesu ngakpo 'ngú bhú ogbitaku ká ni?

(Tsia bhú Mat. 13:10-17; di ne bhú Luk. 8:9-10.)

¹⁰ Pipita-a, li Yesu atigala bha lie ne omukpata ndjikpa ne ká bhisi di ne okpála inde adu nadu

de ani titi o-o, u aholo nayi ani pindji ogbitaku-o. ¹¹ Ani atsia agie pi uo me: «Ngayi-e, Nau gba Ebhe ambamba ta e pi yi ambamba. La-a, pi okpála bhende kilidjo-o, ma bha ngapapa pi uo bhú ogbitaku. ¹² A ko ngubula me engú inde bhú Bhuku gba Ebhe-e mene lie. Engú inde me: <Abana u du atsia 'kpí-e, u ú 'kpí de, abana u du adje 'kpí-e, u ké mbolimboli de. Kaka-a, u dji bua o de, Ebhe 'é di siti 'ngú gba uo-o de.†>>

Yesu ambamba ta gbitaku gba bhulu nalu nguwa

(Tsia bhú Mat. 13:18-23; di ne bhú Luk. 8:11-15.)

¹³ Pipita-a, Yesu atsia apa pi uo me: «Yi kə mboli gbitaku bhomu-o de! La mbia inde-e, yi aké mboli ndu ogbitaku koko hana lele pi?»

¹⁴ Bhulu nalu nguwa inde ma de apa 'ngú e ngalu eli gba Ebhe . ¹⁵ Okpála koko maka ngo 'hi kpadji li bili inde li eli gba Ebhe-e alu lie li e-o. Nedhinga u adje eli-e lie, kolo ma 'li ma me-e, Satana gó, ani tsia 'é eli inde alu lie bhú uo-o. ¹⁶ Okpála koko ngasia eli-e bhú doto na ká teme. Nedhinga u ngadje eli-e lie, a bhúe de u ngasia ne djali hana. ¹⁷ Engú bini, u 'o de me eli bhomu-o si kuti e ali bua o-o de. U nga'o 'to o tété bha mbo ngú nedhinga bedi. Kaka-a, nedhinga li okpekpeke da 'ngú ngago lie, i du di-e mbolo ka 'li Ebhe-e, u nga'o ká nabhuka gba o kolo má gala! ¹⁸ Matá-a, okoko ngasia eli-e bhú ká oeti. A bhomu-o, obhende i di me ziba eli inde u ngadje

† 4:12 4:12 Tsia bhú Isa. 6:9-10.

e-o. ¹⁹ Engú bini, u ngabhundja naali pindji ongú na doto inde. Tiatia ngapipite uo. La di-e, ndu ogumu 'ngú ngangá ngali bhú uo, i tsia ngúvo eli-o. Kaka-a, eli-e zú nguwa de. ²⁰ Ngú nabu tata-a, okoko ngasia eli-e bhú doto na dobho. U ngadje eli-o, u ngasisia, u la di ngali lílí. Bhú okoko-o, lílí bini ngali lílí ndjikpa bata, bhú okoko ndjikpa madhia, bhú okoko kámá bini.»

Yesu akpokpo gbitaku na eke

(Tsia bhú Luk. 8:16-18.)

²¹ Pipita-a, Yesu atsia apa pi uo me: «U dhedhedhe eke ngubula na'o'o asa lusa i du di-e asa mako uu? U dhedhedhe mangbo ngubula na'o'o pí misa. ²² Padhá de, anga ehe bini ade inde adúdu bhú pepe, inde i kóto bhú mbasu de-e ade. La di-e, ndu 'he hana inde awo lie mawo inde li kpála u e de-e ade. ²³ I du me a nde li kpála ne djedje ngú nadje 'kpí-e, ani de dje!»

²⁴ Yesu atsia apa pi uo me: «Yi 'o 'to yi li 'ngú ma ngapa e ndjindji, anga yi dje ndjindji-e, yi ké bhadi mboli engú bhelé. ²⁵ Padhá de, anga kpála inde ngakø mboli engú ndjindji-e, Ebhe ambámba bhadi ta engú bhelé pi ani. Engú bini, kpála inde i kø mboli engú ndjindji de-e, u a'é belegu mboye bhende ka ani-o.»

Nau gba Ebhe-e maka ni?

²⁶ Yesu atsia apa matá pi uo me: «Yi tsia nga ehe inde li Nau gba Ebhe-e nde maka e ko. A maka kpála inde adji abhiye ngú nalu nguwa. ²⁷ Ngbikpi ne sukpe, abana ani du bha tila, ne me ani du li zuka, lí nguwa du bha me a nde

ngaze, a nde la di ngabhele. Aní mbila la de me a ngamene lie lele pí-ie de. ²⁸ Doto ne titi e ngakè ngaíza m̄sana. Pipita-a, i bí 'bhi. Li soso-o, i bá lílí inde ato na paká paká. ²⁹ Li lílí mbe-e, kpála alu-o tsia kodho anga a ko nedhinga na'e nguwa abhiye.»

³⁰ Yesu atsia apa matá me: «Ní ti da nakpo 'ndji Naü gba Ebhe-e ne ni, ne me ní ti da nasusuno li mangua gbitaku dho? ³¹ A maka lí 'lá u a'i e me m̄tadi. Li u lu aní bhú doto-o, a ko lí nguwa bhe na yeye ane mane bhú ká oli nguwa hana na píla doto. ³² Engú bini, nedhinga u alu aní lie, a ngabhele, i tsia kólo ngbéngbé ane ondula koko hana. Li oyáyá-a kólo ngbengbengbe da napa me odhu ti da nayiki oti gba o bhú bhiti kpákpá-o.»

³³ Abhom̄-o, Yesu ad̄ asuno bhú ogbitaku bhelé maka obhende bhom̄. Aní ad̄ akpokpo 'li Ebhe pí uo li lele bhende li okpála ad̄ adje aní-e, ti da nakè mbolimboli lie ko. ³⁴ Aní d̄ nani agama 'ngú pí uo padhá de mandí gbitaku. Engú bini, nedhinga aní ad̄ nad̄ lie ne om̄kpata gba e titi o, aní atsia ad̄ ambamba tata-a pí uo hana.

Yesu ayoko kpéke anvi pí 'ngu

(Tsia bhú Mat. 8:23-27; di ne bhú Luk. 8:22-25.)

³⁵ Bha tagolo bhú ekpí bhom̄-o, Yesu atsia apa pí om̄kpata gba e me: «Ní gulu 'ngu ayi 'ngu.»

³⁶ Abhom̄-o, u a'o ká bhiti okpála-o, u an̄ ne Yesu bhú zab̄ aní ad̄ bhú e-o. Ozab̄ koko ad̄ di bhú dabilí bini ne uo. ³⁷ Kolo me-e, kpéke anvi na gipi aholo ape. Ongbo 'ngu-o ad̄ atuko bhú zab̄ masíkpe de me zab̄-o bedhe ne engu. ³⁸ La

ngaani, Yesu-o, ani adu me ani nde ala atabhu zabu-o. Ani a'o 'ndji e pí kuse. Omukpata gba ani anu azuku ani ne napa pi ani me: «Musunu, ní adji amú. A zi 'ngú bhú djila ma di?» ³⁹ Ani azuku lie, ani ambe bhú 'ndji anvi-o. Ani atsia apa pi ngbo 'ngu-o me: «Gba 'bhè ma! Ndjili má bulu!» Anvi a'o nape, engu atsia akolo guguo má bi! ⁴⁰ Yesu atsia apa pi omukpata gba e me: «Yi ne tsulu mo-o ka ni? Nabhuka nga bhú yi adi?» ⁴¹ Engú bini, u adu adje tsulu naali. U atsia adu apa sunda o me: «Ae mangua kpála dho i ngadje belegu e ne anvi di ne engu-o?»

5

Yesu akobho kpála bini inde li siti bua adu nadu bhú e
(*Tsia bhú Mat. 8:28-34; di ne bhú Luk. 8:26-39.*)

¹ Pipita-a, Yesu ne omukpata gba e akolo ayi 'ngu, bhú ndu doto gba okpála na Gelasa. ² Li Yesu akoto lie bhú zabu-o, kolo me-e, kpála bini akoto li bili na olata, ani atsia ago abhaka ani. Kpála ango-o, siti bua adu nadu bhú ani. ³ Kpála ango-o adu nadu bhú ká olata. Kpála bini ti nani da nagbite ani de, belegu de ne gbindjili. ⁴ Padhá de, anga bhutsibhutsi, u adu agbite 'dhu ani di ne 'kpa ani ne ogbindjili. Engú bini, ani adu akokodho ogbindjili bhomu-o má dhu dhu dhu! Kpála bini ko nani angu e pí ani de. ⁵ Ndu 'kpí hana sukpe ne ngbikpi ani adu bha nasusula bhú ká olata di ne bhú ká oeta. Ani atsia adu natsotsolo eka li kute e ngae makpe ne oteme.

⁶ Aní au Yesu lie me aní nde nga bha tsutsu-o, aní ago ne holo, aní atutu lipuku e kuto kala aní. ⁷ Aní atsia asula kpekpeke me: «Yesu, Ndili gba Ebhe Apí 'Kpí, mo okunda namene ngú ma pi? Ma akikiliki lima pi mu! Ne 'li Ebhe, mo otó mbolo li ma de.» ⁸ (Aní asula mo-o, anga Yesu apa nani pi siti bua ango-o me aní koto bhú kpála bhomu-o makoto!) ⁹ Abhomu-o, Yesu ayi aní me: «A 'li mu pi?» Aní agie pi aní me: «A 'li ma me Bhelé, anga ya bhibhiti.» ¹⁰ Abhomu-o, osisiti bua-a akikiliki lio pi Yesu naali me aní agbe o bhú ndu doto bhomu-o de.

¹¹ A abhaka me 'ngbé piga opame nde ngazu 'he li pabu 'ta oo. ¹² Osisiti bua atsia akikiliki lio pi Yesu me: «Tima ya bhú ká opame inde, amba ya li bhú uo.» ¹³ Abhomu-o, Yesu atsia aziba pi uo. U aze bhú kpála ango-o, u atsia ali bhú opame-o. Piga opame bhomu-o libhomu akè eta ne holo, u anu atuko bhú ekpe-o, u atsia amu ndu o hana. U adu masikpe de kutu bhisi.

¹⁴ Abhomu-o, omulila gba opame atsi naao ne holo. U anu akpokpo 'ngú ango-o pi okpála abhú gudhu ne bhú okuti na ngongo. Okpála atsia ago ngú nau engú inde akodho 'kpí-o. ¹⁵ U ago de Yesu, u au kpála inde li bhiti osisiti bua adu nadu bhú e-o: aní adu me aní nde adu kuto, aní nde ato bongo li e, aní nde ngabhundja 'ngú ndjindji. Abhomu-o, u atsia adje tsulu naali. ¹⁶ Okpála bhende au engú ango-o, atsia akpokpo engú inde akolo li kpála bhomu-o, di ne li opame-e pi uo.

¹⁷ Abhomu-o, u atsia aholo nakikiliki lio pi Yesu me aní yie bhú ndu doto gba o yiyie. ¹⁸ Li Yesu

adu a'u lie bhú zabu-o, kpála li siti bua adu igini bhú e, adu akikiliki lie pi ani me ni du bha ibili ne ani bhú dabili bini. ¹⁹ Yesu tsia ziba pi ani mo-o de. Engú bini, ani apa pi ani me: «Gie limu agba mu, bhú ká okpála na piga gba mu-o, amba mu kpokpo ndu 'ngú hana li Ngámá amene e pi mu-o maka ani adje ndjinga mu lie pi uo.» ²⁰ Abhomu-o, kpála ango-o atapa. Ani atsia aholo nakpokpo ndu 'ngú hana li Yesu amene e pi ani-e bhú ndu doto na Ogudhu Ndjikpa. Okpála inde adu adje ani-e, ndu uo hana adu angamba naali.

Yesu akobho ndili na eelə gba Yailo di ne elə bini

(Tsia bhú Mat. 9:18-26; di ne bhú Luk. 8:40-56.)

²¹ Li Yesu agie matá lie lie ayi ekpe-o, kambi okpála abedhe de ani bedhe lingo ekpe-o. ²² Abhomu-o, suka ongámási na eti nadjé líli gba Moidje ago. A du li ani me Yailo. Ani au Yesu lie, ani ati bhú li 'dhu ani. ²³ Ani atsia akikiliki lie pi ani ne kekele ne napa me: «Ndili na eelə gba ma-a masikpe de nakpi. Gogo, nu 'o 'kpa mu pí 'ndji ani ngubula me ani kobho, amba ani akpí-i de.» ²⁴ Abhomu-o, Yesu anu ne ani bhú dabili bini. Bhiti okpála na bhibhiti naali adu akpata ani. U aholo nasulu ani.

²⁵ Abhomu-o, elə bini inde asi ne kuo naze ka ngute kalanga ndjikpa ne ká bhisi-e adu oo. ²⁶ Bhiti omutia inde atia nani ani-e, aha nani likabhu pi ani naali. Padhá de, anga ani andjia nani tia nganda e hana má kpəkəbhə, ani kobho de! Engú bini, kuo gba ani-e adu mangbo nakolo

sisiti naali. ²⁷ Anì adje ngali gba Yesu-o lie, abhomu-o, anì ago bhú ká bhiti okpála ne akele anì, anì atsia abu 'kpa e li bongo gba anì-o. ²⁸ Padhá de, anga anì adu apa li bua e me: «Í du me ma nde abu nga bha bini 'kpa ma li bongo gba anì-e, ma kóbho.» ²⁹ Abhomu-o, kolo ma 'li ma me-e, ngute-e akodho má ká! Anì atsia ambila bhú e me Yesu akobho ni ne kuo gba ni-e akobho.

³⁰ Bha li nedhinga bhomu-o, Yesu ambila bhú e makpe me angu nakobho kpála akoto bhú ni. Abhomu-o, anì atsia tsia 'kpí ne lingo e hana, anì atsia ayi me: «A abu 'kpa e li bongo gba ma-a da?» ³¹ Abhomu-o, omukpata gba anì-e agie pi anì me: «Mu ngau hana me bhiti okpála asulu mu má wakaka! Lele pi mu ti da nayi lie me: «Abu 'kpa e li ma da-ie?»» ³² Engú bini, Yesu adu bha natsitsia 'kpí lingo e ngú nau kpála inde amene engú bhomu-o. ³³ Òlò ango-o adu adje tsulu, anì aholo naguku. Padhá de, anga anì ambila nani engú inde akolo li anì-e ndjindji. Anì ago ati bhú li 'dhu Yesu, anì atsia apa ndu 'ngú hana na kukulu pi anì. ³⁴ Abhomu-o, Yesu atsia apa pi anì me: «Ndi òlò-e, nabhuka gba mu-o akobho mu akobho, nu ne guo 'ngú . Mo okobho ne kuo gba mu-o akobho.»

³⁵ Yesu ndjia nga nagama 'ngú de, okpála inde ayie agba Yailo akolo. U atsia apa pi anì me: «Ndili gba mu-o akpi. Mo ondála matá Musuno de.» ³⁶ Engú bini, Yesu 'o 'to e li 'ngú u adu apa e de. Anì apa bha pi Yailo me: «Mo odjé tsulu de, du bha ne nabhuka.» ³⁷ Yesu tsia ziba pi kpála

koko nanu ne o de. U anu bha bhú dabili bini ne Piele ne Djaki, a la di-e Djaa ndai Djaki-o. ³⁸ U akolo akuti gba Yailo. Yesu au me okpála má dja dja dja! U adu aku 'gbá naali, u atsia adu di atu 'ue. ³⁹ Abhomu-o, ani ali abhú 'ti, ani atsia apa pi uo me: «Yi má dja dja dja di ne naku 'gbá naali me-e ka ni? Ndili-e kpi de, engú bini, ani tila.» ⁴⁰ Abhomu-o, u aholo amu ani.

Engú bini, ngaani-e, ani apandja ndu okpála hana kilidjo. Ani aha bha bini 'dyi ndili-e ne 'hi ndili-o, la di ne omukpata gba e bata-o. Abhomu-o, u atsia ali ne uo abhú tina 'ti inde li ndili-e adu bhú e-o. ⁴¹ Ani aha 'kpa ndili-o, ani atsia apa pi ani me: «Talita kumi!» (Tata-a me: «Ndi elo-e, ma apa pi mu me yie bhúlá!») ⁴² Ndi elo-ango-o (inde adu nani ne kalanga ndjikpa ne ká bhisi ayie kolo bhúlá má gala! Ani atsia aholo nadhuku). Bhú nedhinga bhomu-o, bhú 'bhe okpála akpina má di! ⁴³ Abhomu-o, Yesu agbele 'dje uo kpekpeke me u apa engú ango-o pi kpála belegu de bini. Pipita-a, ani atsia apa pi uo me u ha ezu pi ani.

6

Okpála na Nadjaleta ayala Yesu

(Tsia bhú Mat. 13:53-58; di ne bhú Luk. 4:16-30.)

¹ Yesu ayie li bili bhomu-o, ani atsia gie lie bhú Nadjaleta, kuti inde ani abhele bhú e-o. Omukpata gba ani-e atsia anu di bhú dabili bini ne ani. ² A akolo lie bhú 'kpi naguo gba omaYuda-a , ani aholo nasuno bhú 'ti nadje líli

gba Moidje-o . Abhomu-o, bhiti okpála inde adu nadje ani-e, adu angamba naali. U adu apa me: «A asuno ongu inde-e pi ani da? Ani ayie ne imbilang di ne angu namene ongua ongamba 'ngú inde-e su? ³ A inde-e kpála nagolo ndula-a di? A ko ndili gba Malia di? A ko ndai Djaki ne Djodje, ne Djude, la di ne Simo-o di? Ondaise ani na olisilisi la bhadi bhú dabili bini ne ní sii adi?» Kaka-a, u atsia ayala nabhuka ani.

⁴ Abhomu-o, Yesu atsia apa pi uo me: «U mamanga polofeta ne ndu bili hana. La-a, u mamanga ani de-e bha bhú kuti inde u azu ani bhú e-o, ne bhú ká omaha ani, ne la di bhú ká okpála na bhú 'bu 'ti gba ani-o.» ⁵ Ka ndi nabhuka gba uo-o, ani ti nani da namene ongamba 'ngú oo bhelé de. Ani akobho bha obhulu kuo bedi me ani nde nga'o 'kpa e pi uo. ⁶ Abhomu-o, ani atsia adu angamba naali ka ndi nabhuka gba uo-o.

Yesu atima omakpata gba e ndjikpa ne ká bhisi bhú kulu

(Tsia bhú Mat. 10:5-15; di ne bhú Luk. 9:1-6.)

Pipita-a, Yesu adholo bhú ndu okuti na ngongo hana me ani nde ngasuno pi okpála. ⁷ Abhomu-o, ani a'i omakpata ndjikpa ne ká bhisi gba e-e ngú natima uo bhisi bhisi. Kala natima uo-o, ani aha angu pi uo ngú napandja osisiti bua bhú okpála. ⁸ Ani atsia aha líli inde-e pi uo me: «Yi ahá ehe bini ngú enú-o de, yi ha bha ndula bini. Yi abí ezu de, yi ahá gonia de, yi ató falanga li yi bhú 'ti bongo de. ⁹ Yi dyi maloké bhú 'dhu yi, engú bini, yi adyí bongo na mbulu bhisi de. ¹⁰ Nedhinga yi

li lie bhú gúdhú bini-e, yi de dú bha nasi gba koli kpála bini akólo li 'kpí yi akóto bhú gúdhú ango-o lie ko.

¹¹ I dú me okpála na kúti bini nde sia yi de-e, i dú la di me u nde dje yi de-e, yi de yie oo, amba yi pulu ndju doto na kúti bhómú-o li 'dhú yi hana. Bhobhómú-o asúno ngae me yi abala uo ne ndú 'ngú gba o hana abala.» ¹² Abhómú-o, omúkpaata ndjikpa ne ká bhisi-e agbida. U atsia adú akpokpo ngali gba Ebhe-e pí okpála ne napa pí uo me a ayo me u dji bua o. ¹³ U adú apandja osisiti bua bhelé bhú okpála. U atsia adú akobho okpála na kuo bhelé ne napulu 'mú pí 'ndji uo.

Elode Atipasi aha líli me u bhələ Djaa bhulu nabatisa okpála

(Tsia bhú Mat. 14:1-12; di ne bhú Luk. 9:7-9.)

¹⁴ Abhómú-o, 'ngbé ngámá Elode Atipasi adje engú gba Yesu-o, anga 'li ani ayangba nani ne ndú bili hana. Okpála adú apa me: «Djaa bhulu nabatisa okpála azuku! Kaka-a, a bhú ani ne angu namene ongamba 'ngú.» ¹⁵ Okpála koko adú apa naao me: «A ko polofeta Eliya.» Do okoko me: «A ko polofeta koko maka saka obhende na kalanú-o.» ¹⁶ Li Elode adje engú gba Yesu lie-e, ani atsia apa me: «A ko Djaa bhulu nabatisa okpála! Ma ha nani líli ngama makpe me u kodho ngulu ani. La-a, ani azuku bhómú-o ngae!»

¹⁷ A na paká me Elode atima nani osudha me u nu holo Djaa bhulu nabatisa okpála, amba u to ani bhú tikpu ngubula Elodiade. Elodiade nani ne ələ gba ndai ani Filipo. Engú bini, Elode atsia

aha nani ani maka ɔlɔ ka e. ¹⁸ Abhomɔ-o, Djaa adɔ apa pi Elode me: «Lili ziba pi mɔ ngú naha ɔlɔ gba ndai mɔ-o de.» ¹⁹ Kaka-a, Elodiade adɔ nayala Djaa, ani atsia adɔ akunda me u bhɛlɛ ani. Engú bini, ani ti nani da naha lili de me u bhɛlɛ ani mandi napa me Elode ziba. ²⁰ La pi Elode, ani ambila nani lie me Djaa ne kpála na ngbingbili di na bubu-o, ani adɔ namanga ani naali, ani atsia adɔ di nalila ani. Nedhinga li Elode adɔ adje 'li Djaa lie, mabhundja gba Elode adɔ angbingi naali. Engú bini, ani adɔ ne djali naali ngú nadje ani.

²¹ Abhomɔ-o, li ekpí u azu Elode akolo lie, a adɔ ekpí na babadha pi Elodiade. Elode amene anokomia pi olubasa gba e, pi ongámási na sɔdha, di ne pi ongámási na ndu doto na Galilaya hana. ²² Ndili ɔlɔ gba Elodiade ango-o ago. Ani atsia ali bhú 'ti na anokomia-o. Ani adho ebi, a atsia anga li Elode di ne okpála inde ani a'i o bhú anokomia-o. Abhomɔ-o, Elode atsia apa pi ndili ɔlɔ ango-o me: «Yo 'he inde mɔ nde ne gumɔ e ka ma, amba ma ha pi mɔ.» ²³ Ani atsia atɔ silika pi ani me: «Ehe inde mo oyó e ka ma-a, ma há bha pi mɔ e, abana i dɔ bha nagbo bhusu nau gba ma ko.» ²⁴ Abhomɔ-o, ndili ango-o akoto, ani anɔ ayi 'hi e me: «Mo okunda me ma yo ka ngámá ni?» 'Hi ani atsia agie pi ani me: «Yo 'ndji Djaa bhulɔ nabatisa okpála ko.»

²⁵ Ani agie lie ne holo agba ngámá. Ani atsia apa pi ani me: «Ma akunda me ha mɔma mbia inde-e, bhú tsakpa saani, 'ndji Djaa bhulɔ nabatisa okpála!» ²⁶ Abhomɔ-o, Elode asia

likabhu li bua e naali. Engú bini, aní ti nani da nayayala de ka silika inde aní atú e kala okpála inde aní a'i o bhú anokomia-o. ²⁷ Abhomu-o, Elode atima kolo saka omulila gba e me aní nu, amba aní go ne 'ndji Djaa bhulu nabatisa okpála-o. Mulila ango-o anu, aní atsia akodho ngulu Djaa bhulu nabatisa okpála bhú tikpu-o má tse! ²⁸ Pipita-a, aní aha 'ndji Djaa-a, aní ago ne di bhú tsakpa saani, aní aha pi ndili elo ango-o. Abhomu-o, ndili elo ango-o atsia anu aha pi 'hi e. ²⁹ Li omukpata gba Djaa adje engú ango-o lie, u ago aha kuo aní, u atsia azi.

Yesu aha ezú pi obhosi kutu bhuluvue

(Tsia bhú Mat. 14:13-21; ne bhú Luk. 9:10-17; di ne bhú Dja. 6:1-14.)

³⁰ Pita nagie lie ka obhulu titima ndjikpa ne ká bhisi-e bhú kulu-o, u apo bhula o de Yesu. U atsia akpokpo ndu 'ngú inde u amene e di ne bhende u asuno e hana pi aní. ³¹ Do aní pi uo me: «Yi gogo, ní nu li bili inde li kpála nde lie ade, amba yi guo nga mbo masudha.» Padhá de, anga okpála inde adu nago, di ne obhende adu agie lio-o, u adu bhibhiti naali. Kaka-a, Yesu ne omukpata gba e sia belegu nedhinga ngu nazu 'he de. ³² Abhomu-o, u a'u'u bhú zabu-o, u atsia atapa bha ngao kpi o kpi li bili li kpála nde li e ade ko. ³³ Engú bini, okpála bhelé au maka u adu anu lie hana. U atsia ambila me a ko uo. Abhomu-o, okpála ayie ne ndu ogudhu bhelé, u agu holo ne 'dhu o, u atsia akolo li bili ango-o pi Yesu ne omukpata gba e kalanu. ³⁴ Li Yesu akoto lie bhú zabu-o, aní au bhiti okpála-o. Aní

adje ndjinga uo, anga u adu maka okandole inde li malila nde ka o ade ko. Abhomu-o, ani atsia aholo nasuno engu bhelé pi uo.

³⁵ A akolo lie masikpe de nabi ka ekpi-e, omukpata gba ani-e adyudyo lio de ani. U atsia apa pi ani me: «Ekpí-e ngabi, a la di-e mili bili. ³⁶ Ha kpadji pi okpála inde, amba u nu kala ezu nazu mazu pi o li ongangba di ne bhú okuti na ngongo si.» ³⁷ Engu bini, Yesu agie pi uo me: «Yi ha ezu pi uo ngayi makpe!» Abhomu-o, u atsia ayi ani me: «Ya ayie ne bhiti tia ngu nakala ezu nazu mazu pi bhiti okpála inde-e su?» ³⁸ Abhomu-o, ani ayi uo me: «Mapa ka yi madho? Yi nu tsitsia!» U atsia lie, u atsia apa me: «A ka ya ne mapa bhuluvue, la di ne sungu bhisi.»

³⁹ Abhomu-o, Yesu atsia aha lili pi uo me: «Yi pa pi ndu okpála hana me u popo bhúla o, amba u dula kuto pi ulu-o.» ⁴⁰ U apopo bhúla o, u adula kuto: okoko kama kama, okoko ndjikpa bhuluvue ndjikpa bhuluvue. ⁴¹ Abhomu-o, Yesu aha mapa bhuluvue ne sungu bhisi-o. Ani atsia 'kpi ne abhula, ani atsia agie heni pi Ebhe nganga. Pipita-a, ani atsia agugumu mapa angoo, ani aha pi omukpata gba e-o, amba u gapa li okpála. Ani atsia agapa di sungu bhisi-e pi ndu okpála hana. ⁴² Ndu uo hana azu 'he, u atsia a'u'u ma kpe-e kpe-e! ⁴³ Pipita-a, omukpata alo du mapa ne sungu inde atigalao, a atsia abebedhe okili ndjikpa ne ka bhisi. ⁴⁴ Bhu ka obhende azu 'he angoo, obhosi nani kutu bhuluvue. (Mandi natanga olisi ne ongisi.)

Yesu adholo pí 'ngu

(Tsia bhú Mat. 14:22-33; di ne bhú Dja. 6:15-21.)

⁴⁵ Pipita kolo me-e, Yesu apa pí omukpata gba e me: «Yi 'u'u bhú zabu. Yi kodho 'kpí muma kalanu ayi 'ngu li pápá na gudhu na Betesaida li nedhinga ma nde nga lie naha kpadji pí okpála ko.» ⁴⁶ Pita nagbo bhusu e ne uo-o, ani anu a'u apí 'ta ngu nayo Ebhe. ⁴⁷ Li ekpí abi lie, omukpata adu ne zabu atu 'ngu, Yesu atsia atigala apí 'go kpi e kpi. ⁴⁸ Ani au me omukpata gba ni-e ale nadjele zabu pima anga anvi adu amene uo kpekpeke. Abhomu-o, akolo lie bhú 'gbá 'ngu na bini-e, ani aholo nadholo pí 'ngu, ani atsia akolo masikpe de uo. Ani di me ne uo mane. ⁴⁹ Engú bini ngauo-o, u au ani lie ngadholo pí 'ngu-o, u abhundja naao me a ko igbadyibhe. Kaka-a, u aholo natu 'ue. ⁵⁰ Padhá de, anga u adu au ani ndu o hana. Kaka-a, u atsia abedhe ne tsulu na kuo kuo. La-a, ani atsia apa bha kolo pí uo me: «Yi sia kpéke bua! A ko ma, yi adjé tsulu de!»

⁵¹ Abhomu-o, ani a'u nganda uo bhú zabu-o, anvi-e a'o nape. U atsia adu ne nangamba na kuo kuo. ⁵² Padhá de, anga ngamba 'ngú inde ani amene e li mapa-a, u mbila nga nani de ka ndi nabhuka gba o-o.

Yesu akobho kpála na kuo bhú ndu doto na Genedjaleta

(Tsia bhú Mat. 14:34-36.)

⁵³ Pita u agulu ekpe na Galilaya lie, u atsia akolo bhú ndu doto na Genedjaleta. Abhomu-o,

u atsia agbite zabu lingo 'kpø-o. ⁵⁴ U aze lie bhú zabu-o me-e, okpála ambila bha kolo me Yesu ngae inde. ⁵⁵ Abhomu-o, okpála adji ndu doto ango-o libhomu ne holo. U aholo nabi obhulu kuo pí okalagba, ne nanu ne uo li bili inde u adu adje lie me Yesu li e-o. ⁵⁶ Ndu bili hana inde li ani adu anu li e, li ongangba, bhú ogudhu, i du di-e bhú okuti, okpála adu nabu obhulu kuo bhú odaposo. Obhulu kuo ango-o adu akikiliki lio pi ani me ani ha kpadji me o bu nga bha 'kpa o li 'so bongo li ani-o. A na paká me ndu okpála hana inde adu nabu 'kpa o li ani-e, adu nakobho.

7

Ongú inde ngayie li bua kpála nga'o kpála sisiti kala Ebhe ngae

(Tsia bhú Mat. 15:1-9.)

¹ Abhomu-o, omuFalisai di ne omusuno koko na líli gba Moidje inde ayie nani bhú Yelusalema-a, ago apo bhúla o de Yesu. ² U au me okoko bhú ká omukpata gba Yesu-o ngazu 'he mandí navulu 'kpa o kalanu. Kaka-a, omuFalisai adu abhundja me omukpata bhomu-o bubu kala Ebhe ade. ³ (Padhá de, anga omuFalisai ne ndu omaYuda hana ngalila odasundu gba onguo ogbi o-o. Kaka-a, kala nazu 'he-e, u vuvulu ngaiza 'kpa o i lí mali. ⁴ I du me u nde kolo bhú daposoo, u vuvulu 'kpa o ndu 'kpí hana kala nazu 'he. U ngalila di olíli koko u asia e ka onguo ogbi o naali maka: navulu okópo, obhende maka zulubho di ne obhende maka zikio.) ⁵ Abhomu-o, omuFalisai di ne omusuno na líli-e ayi Yesu me: «Omukpata

gba mụ-o ngakpata 'ngú maka li dasundụ gba onguo ogbi ní apa lie ade. U ngazụ 'he me u nde vùlụ 'kpa o de. U ngamene la mo-o ka ní?»

⁶ Yesu agie pì uo me: «Polofeta Isaya pa nani tala li 'ngú gba yi-e me, yi ne obhulụ kali. Anì aye nani bhú bhuku gba e me:

«Okpála inde-e ngamanga ma bha ne 'bhø o padhá.

La-a, bua uo de ma tsutsu.

⁷ Nadhøgø gba uo zi bhú djila ma de.

Padhá de, anga ongú inde u ngasuno e a ko bha bhende i ngayie ka okpála.†»

⁸ Yi nga'o ká olíli gba Ebhe-e ngú nazi 'ndjì yi bhú olíli gba onguo ogbi yi.»

⁹ Anì atsia apa matá pì uo me: «Yi nga'o olíli gba Ebhe-e li ngongo ngubula nalila odasundụ gba onguo ogbi yi-o. ¹⁰ Padhá de, anga Moidje apa nani me: «Manga 'dyi mụ ne 'hi mụ mamanga.» Anì atsia apa matá di me: «Kpála bhende i sobho 'dyi e, i dū di-e 'hi e, a ayo me u bhølø anì mabhølø.»† ¹¹ Engú bini, ngayi-e, yi ngasuno pì okpála me, kpála bini ti da napa pì 'dyi e, i dū di-e 'hi e me: «Mbu li ma, anga ehe inde ayo igini me ma ha e pì mụ-o, a ko makiso inde ma adji naha e pì Ebhe.» ¹² Ngayi omụFalisai-e, yi ngaziba bhomụ-o pì okpála me u améne 'he pì odyi o di ne pì ohi o belegu de bini. ¹³ Kaka-a, yi bhomụ-o ngalila odasundụ gba onguo ogbi yi-e ane eli gba Ebhe-e mane. Yi la di ngamene ndū ngua ongú bhomụ-o bhelé.»

† **7:7** 7:6-7 Tsia bhú Isa. 29:13. † **7:10** 7:10 Tsia bhú Eki. 20:12; ne bhú Det. 5:16; ne bhú Eki. 21:17; di ne bhú Lev. 20:9.

¹⁴ Pipita-a, Yesu a'i matá bhiti okpála-o. Abhomu-o, ani atsia apa pi uo me: «Yi dje ma ndu yi hana, amba yi ke la di mboli engu inde: ¹⁵ Ehe bini ade inde yi zu e, i 'o yi sisiti-o. La-a, engu inde ngakoto li bua yi-e, maka oeli di ne okulu-o, a bhomu-o ongu inde nga'o yi sisiti-o.» [¹⁶ *]

¹⁷ Li Yesu ayie lie bhú ká bhiti okpála bhomu-o, ani atsia ali abhú 'ti-e, omukpata gba ani atsia ayi ani li ta gbitaku bhomu-o. ¹⁸ Abhomu-o, Yesu atsia apa pi uo me: «Ngayi di-e, yi mbila 'ngu inde-e di? Yi mbila de me ndu 'he hana li kpála ngazu e ti da na'o ani siti kpála de-e di? ¹⁹ Padhá de, anga ezu ango-o ngali li bhobua ani ade. Engu bini, a ngali bhú 'bu ani. Pipita-a, i tsia koto.» (Yesu adu apa bhomu-o me ndu 'zu hana ndjindji ngu nazuzu.) ²⁰ Abhomu-o, Yesu atsia abu tata-a me: «Engu inde ayie li bua kpála, a bhomu-o bhende i nga'o kpála sisiti-o. ²¹ Padhá de, anga osisiti 'ngu inde ngayie li bhobua kpála ngae inde: omabhundja na sisiti, zabhe, ezi, nabhili okpála, ²² nakunda olisi, i du di-e obhosi gba okpála koko, kundu tia, gumu namene osisiti 'ngu, kali, bambakuya, gumu 'he gba okpála koko, osobho, 'ngbé 'ndji di ne pulu 'ngu. ²³ Ndu osisiti 'ngu bhomu-o hana ngakoto li bhobua kpála, i tsia 'o kpála ango-o sisiti bhú djila Ebhe.»

* **7:16** 7:16 Lukuluku inde-e, a bhú obhuku koko na didili u aye e bhú eli na giliki ade. [La bhú okoko-o, u aye me: «Kpála inde ne djedje ngu nadge 'kpí-e, ani de dje.»]

*Gandji ɔlɔ bini abhuka Yesu
(Tsia bhú Mat. 15:21-28.)*

²⁴ Pipita-a, Yesu ayie oo, ani atsia atapa bhú doto inde lingo gudhɔ na Tile. Ani ali bhú 'ti bini, ani tsia kunda de me u mbila de me ni oo de. Engú bini, ngali nago ka ani-e adje lie ne ndu bili hana. ²⁵⁻²⁶ Ma 'li ma me-e, gandji ɔlɔ bini adje 'ngú gba Yesu-o. Ɖlɔ ango-o dɔ nani maYuda de. Dɔ ani ayie nani bhú ndu doto na Fenisia, bhú doto na Silia. Ndili gba ani na ɔlɔ adɔ me siti bua nde bhú ani. Abhomɔ-o, ɔlɔ bhomɔ-o ago ati bhú li 'dhɔ Yesu, ani atsia ayo ka Yesu me ani gbe siti bua bhú ndili ɔlɔ gba ni-o. ²⁷ Yesu atsia apa pi ani me: «'O nga ongisi me u zɔ 'he gba o, amba u 'u'u. Padhá de, anga a ndjindji ade me u ha mapa gba ongisi ngú nabhibhike pi ongisi bulu-o de.» ²⁸ Ɖlɔ ango-o atsia agie pi Yesu me: «Ngámá, belegɔ ongisi búlu ngazɔ okulu 'zɔ bhende i ngabala asa misa-o.» ²⁹ Yesu apa pi ani me: «Bha bini ka 'li mɔ bhomɔ-o, nɔnɔ, siti bua-a akoto bhú ndili gba mɔ na ɔlɔ-o akoto.» ³⁰ Abhomɔ-o, ɔlɔ ango-o agie lie agba e, ani atsia abhaka ndili-e me ani nde asi pi mako me siti bua nde akoto bhú ani akoto.

Yesu akobho bhoko inde i bhɔ 'ngú de, i dje di 'kpí de

³¹ Pipita-a, Yesu ayie bhú ndu doto na gudhɔ na Tile. Ani apɔ bhú Sidona. Ani anɔ li pápá na ekpɔ na Galilaya, ani atsia akolo bhú ndu doto na Ogudhɔ Ndjikpa. ³² U atsia ago pi ani ne bhoko bini inde i dje 'kpí de. Bhoko ango-o da nagama 'ngú ka ani adɔ kpekpeke. U atsia akikiliki lio pi

Yesu me ani 'o 'kpa e pí bhoko ango-o, amba ani kobho.

³³ Abhomu-o, Yesu atsia aha ani, ani anu ne ani li ngongo masudha de bhiti okpála-o. Ani atsia 'o likpa e bhú 'dje ani. Ani aku ngusu li likpa e, ani atsia 'o pí 'mi bhoko ango-o ko. ³⁴ Pipita-a, Yesu atsia 'kpí ne abhúla, ani awo má fe, ani atsia apa pí bhoko ango-o me: «Efata!» (A akunda napa me: «A ayo me bhulu limu!») ³⁵ Ma 'li ma me-e, 'dje ani abhulu lie, 'mi ani ayaka, ani aholo agama 'ngú ndjindji. ³⁶ Yesu atsia aha líli pí okpála me u avé 'ngú ango-o pí kpála belegu de bini. Engú bini, ani adu ayoko uo lie, engú ango-o tsia dje yoko de. ³⁷ U adu angamba na kuo kuo. Kaka-a, u atsia adu apa me: «Ani ngamene ndu 'ngú hana ndjindji. Ani ngaha pí obhende i dje 'kpí de-e nadje 'kpí. Ani ngaha pí obhende i bhú 'ngú de-e nabhu 'ngú.»

8

*Yesu aha 'zu pí okpála kutu badha
(Tsia bhú Mat. 15:32-39.)*

¹ Bhú oekpí bhomu-o, bhiti okpála apo matá bhúla o de Yesu. Abhomu-o, li ehe nazu mazú du la lie ka uo de-e, Yesu atsia a'i omakpata gba e, ani atsia apa pí uo me: ² «Ma ngadje ndjinga bhiti okpála inde, anga akolo mbia inde-e 'kpí bata u bha ngadu de ma si, ehe nazú mazú la matá di ka uo ade. ³ I du me ma nde agie uo agba o ne gumu mo-o, angu uo ndjia li kpadji, anga a di bhú ká uo ne okpála bhende ayie tsutsutsu.» ⁴ Omakpata gba ani agie pí ani me: «Ní aú ezú

bhú mili bili si-e ngubula nazuzu ka uo su?»
⁵ Abhomu-o, Yesu atsia ayi uo me: «A ka yi ne mapa madho?» U agie me: «Mananika.»

⁶ Abhomu-o, ani apa pi bhiti okpála me u dudu kuto. Ani aha mapa mananika-o, ani agie heni pi Ebhe. Ani agugumu mapa-o, ani atsia aha pi omukpata gba e me u gapa li okpála. U atsia agapa li uo. ⁷ U adu di nani ne djedje osungu. Ani agie di heni pi Ebhe ngu osungu-o, ani atsia apa me u gapa di osungu-o li uo. ⁸ Okpála azu 'he, u a'u'u. Pipita-a, omukpata apo bhúla dúdú inde atigala, atsia abebedhe okili mananika. ⁹ Okpála inde adu oo, u adu masikpe de kutu badha. Pipita-a, Yesu atsia aha kpadji pi uo. ¹⁰ Kolo má gala me-e, ani a'u ne omukpata gba e bhú zabu, u atsia atapa bhú ndu doto na Dalamanutu.

*Omufalaisi ayo ngamba 'ngú bini ka Yesu
 (Tsia bhú Mat. 16:1-4.)*

¹¹ Abhomu-o, omufalaisi ago, u aholo namene kpekebhe ne Yesu. U adu akunda nale ani. Kaka-a, u ayo ka ani me ani mene nga bha pi o ngamba 'ngú bini inde asuno me Ebhe atima ani ngae. ¹² Li Yesu adje lie mo-o, ani atsia apa me: «Okpála na naki inde-e ngayo ngamba 'ngú ngubula ni? Ma apa pi yi na paká me, ma méne ngamba 'ngú bini pi uo de!» ¹³ Ani a'o ka uo oo, ani a'u matá bhú zabu, ani atsia akodho 'kpí ayi 'ngu.

*Yi lila liyi ka levile gba omufalaisi di ne bhe
 gba Elode malila
 (Tsia bhú Mat. 16:5-12.)*

¹⁴ Li omukpata a'u lie bhú zabu-o, u a'ili 'to o li naha mapa. Kokoli adu bha ka uo bini bhú zabu-o. ¹⁵ Abhomu-o, Yesu atsia agbele dje uo me: «'E-e! Yi lila liyi ka levile gba omuFalisai di ne bhende gba Elode malila.» ¹⁶ Omukpata aholo namene kpekebhe sunda o me: «Ani ngapa mo-o, anga ní go ne mapa de.»

¹⁷ Li Yesu ambila engú inde u adu apa e sunda o lie, ani atsia ayi uo me: «Yi ngamene kpekebhe sunda yi li 'ngú na mapa li 'to yi a'ili li e ka ni? Yi ke nga mbolimboli di? Yi mbila la di di? Yi ne nabhuka adi? ¹⁸ Ali yi ne djidjila, yi ngau 'kpí adi ka ni? Ali yi ne djedje, yi ngadje 'kpí adi ka ni? 'To yi a'ili li ndu ongamba 'ngú inde ma amene e hana? ¹⁹ Nedhinga ma aku nako obhosi kutu bhuluvue lie ne mapa bhuluvue, dudu inde atigala-a, yi abebedhe nako okili ne di madho?» U agie pi ani me: «Ndjikpa ne ká bhisi.» ²⁰ Abhomu-o, Yesu atsia ayi matá uo me: «La di-e, mapa mananika inde ma aku nako okpála kutu badha ne e, dudu inde atigala-a, yi abebedhe nako okili ne di madho?» U agie me: «Mananika.» ²¹ Abhomu-o, Yesu atsia apa pi uo me: «Yi ke nga mbolimboli sii di?»

Yesu akobho kpála bini inde i u 'kpí de

²² Pipita-a, Yesu ne omukpata gba e akolo bhú gudhu na Betesaida. Oo, okpála ago ne kpála bini inde i u 'kpí de-e pi Yesu. U atsia akikiliki lio pi ani me, ani 'o 'kpa e li ani amba ani kobho. ²³ Yesu aholo 'kpa kpála inde i u 'kpí de-o. Ani agbe ani bhú gudhu-o. Ani aku ngusu e bhú djila ani, ani abu 'kpa e li ani, ani atsia ayi ani me:

«M̄ ngau mbo-o 'he uu?» ²⁴ Kpála ango-o atsia 'kpí li ngo e, ani atsia apa me: «Ma ngau okpála, u mana ndula inde ngadhuku.» ²⁵ Pipita-a, Yesu abu matá 'kpa e li djila ani. Kpála ango-o atsia 'kpí má s̄u, ani atsia adu au 'kpí ndjindji. Ani atsia akobho. ²⁶ Abhomu-o, Yesu agie ani agba e, ani atsia apa pi ani me: «Mo onú abhú gudhu de.»

Piele apa me Yesu ne Kilisito

(Tsia bhú Mat. 16:13-20; di ne bhú Luk. 9:18-21.)

²⁷ Pipita-a, Yesu ne omukpata gba e anu bhú okuti inde li ngo gudhu na Sedjale gba Filipino-o. Li kpadji-e, ani ayi uo me: «Okpála ngapa li ma me ma ne da?» ²⁸ U agie pi ani me: «Okoko ngapa me mu ne Djaa bhulu nabatisa okpála, okoko me mu ne Eliya, okoko matá me mu ne saka opolofeta .» ²⁹ Yesu atsia ayi uo me: «A la yi-e, yi ngapa naayi me ma ne da?» Piele atsia agie pi ani me: «M̄ ne Kilisito .» ³⁰ Abhomu-o, Yesu atsia aha líli pi uo kpekpeke me u apá 'ngú gba ni-e pi kpála bini de.

Yesu akpo 'ngú pindji nakpi ne nazuku ka e

(Tsia bhú Mat. 16:21-28; di ne bhú Luk. 9:22-27.)

³¹ Pipita-a, Yesu aholo nasuno pi omukpata gba e me: «A ayo me ngama Ndili gba kpála-a, ma dje likabhu naali. Obhelesi okpála, ongbengbe odimandø gba Ebhe di ne omusuno na líli gba Moidje ayála ma. U tsia bhólø ma. La-a, pita ekpi bata-a, ma tsia zuku.» ³² Ani du apa 'ngú ango-o lie ne tsulu de-e, Piele atsia agbele ani li ngongo.

Do ani pi Yesu de-e: «Mo opá mo-o de.» ³³ Engú bini, Yesu adji lie, ani atsia omukpata gba e-o, ani ambe bhú 'ndji Piele me: «Yie de ma mayie, ngamụ Satana ! Padhá de, anga mabhundja gba mụ-o, a ko bhende gba Ebhe-e de. Engú bini, a ko bhende gba okpála.»

A ayo namene ni ngú nakpata Yesu-o?

³⁴ Pipita-a, Yesu apo bhúla bhiti okpála di ne omukpata gba e de e. Ani atsia apa pi uo me: «I dū me kpála nde akunda nakpata ma-a, a ayo me ani 'o nabhundja engú gba e makpe, ani bi la di kulusi gba e, amba ani kpata ma. ³⁵ Padhá de, anga kpála bhende ngalila mukobho gba e pi e makpe, akpi makpi. La-a, kpála bhende ngaha mukobho gba e libhomu ngubula ma di ne ngubula Bádha Ngali gba Ebhe-e, ani akóbho makobho. ³⁶ I dū me kpála nde asia ndū tia na doto hana, tata-a pi ani ne ni i dū me ani nde akpi na dūduma-a? ³⁷ Ehe bini ade inde li kpálakuti ti da na'o e bhú da mukobho gba e. ³⁸ I dū me kpála bini nde adje nūmū li ma di ne li oeli gba ma kala obhulū namene sisiti 'ngú na naki inde-e, inde i bhuka di Ebhe ne bua o bini de-e, ngama Ndili gba kpála ma adjé bhadi nūmū li ani nedhinga ma agó lie bhú sangu gba 'Dyi ma bhú dabili bini ne oandjelu na bububu ko.»

9

¹ Yesu atsia apa matá pi uo me: «Ma apa pi yi na paká me, okpála koko bhú ká obhende si-e,

mú padhá de, u aú ngaiza Nau gba Ebhe-e me, a nde ngago ne angu kalanu.»

Kute Yesu ayipa ka sangu gba Ebhe

(Tsia bhú Mat. 17:1-13; di ne bhú Luk. 9:28-36.)

² Pita ekpí madhia, Yesu aha Piele ne Djaki, di ne Djaá , aní anu ne uo titi o apí 'ndjá 'ta. Bha si me-e, aní adji lie kala uo kpi, ³ bongo gba aní avu má tuu! Píla doto libhomu-o, kpála bini tí da navulu bongo, í tsia vú mo-o de. ⁴ Kolo me-e, Eliya ne Moidje aze lí uo, u atsia aholo agama 'ngú ne Yesu. ⁵ Piele atsia apa pí Yesu me: «Musuno, a ndjindji maka ní nde lie si. Ziba pí ya me ya yiki otí ngbangbali bata: bini pí m̄, bini pí Moidje, bini pí Eliya.» ⁶ Engú bini, Piele du ambila de me ní apa pí-ie de, anga ngaani makpe ne omukpata bhisi inde adu bhú dabili ne ani-e, adu me u nde abedhe ne tsulu na kuo kuo. ⁷ Abhomu-o, ndindi ago abuku uo má kagbu! Eli atsia akoto bhú ndindi ango-o me: «Kpála inde-e, a ko Ndili gba ma inde ma akunda e naali-o. Yi dje ani!» ⁸ Ma gala kolo me-e, lí omukpata atsia 'kpí lie lingo o-o, u u matá kpála bini de, bha Yesu kpi e kpi bhú dabili bini ne uo.

Omukpata ayi 'ngú pindji polofeta Eliya

⁹ Lí Yesu ne omukpata gba e adu akè eta-a lie, aní atsia apa pí uo me: «Yi apá engú yi au e inde-e pí kpála belegu de bini, akólo lí nedhinga inde ngama Ndili gba kpála ma azúku lie bhú ká okpála inde amu ko.» ¹⁰ Abhomu-o, u awo eli bhomu-o lí bua o, u atsia adu ayi lío sunda o

pépé me: «Nazuku bhú ká okpála inde amu-o, aní akunda igini napa bhomu-o pí?»

¹¹ Pípita-a, u ayi Yesu me: «Ka ni li omusunu na líli gba Moidje ngapa lie me kala nago ka Masiya-a , a ayo me Eliya go ngaiza kalanu-o?» ¹² Yesu atsia agie pí uo me: «A na paká me Eliya ngago ngaiza kalanu, naleke ndu 'ngú hana. Engú bini, ka ni u aye nani lie bhú Bhuku gba Ebhe-e me, Ndili gba kpála adjé likabhu naali, la di-e li okpála tsia yála ani-e? ¹³ La-a, ma apa pí yi me, Eliya ago nani ago, okpála atsia ato mbolo li ani má gbekpe maka u a aye lie bhú Bhuku gba Ebhe ko.»

Yesu akobho ndili na bhobhoko li siti bua adu nadu bhú e
(*Tsia bhú Mat. 17:14-21; di ne bhú Luk. 9:37-43a.*)

¹⁴ Li Yesu ne omukpata bata akè eta-a lie, u anu abhaka omukpata koko-o. A abhaka me bhiti okpála nde asa uo ngbalina. La di-e, omusunu na líli nde ngamene kpekebhe ne omukpata angoo. ¹⁵ Li bhiti okpála-a au Yesu lie, ndu uo hana angamba, u atsia agu holo ngú nago ayi ani. ¹⁶ Yesu ayi omukpata gba e me: «Yi ngamene kpekebhe ne uo pindji ní?»

¹⁷ Kpála bini bhú ká bhiti okpála bhomu-o, atsia agie pí ani me: «Musunu, ma ago ne ndili gba ma-a pí mu me kobho ani, anga a bhú ani ne siti bua inde ngagbite 'bhe ani me ani agáma 'ngú de. ¹⁸ Ndu nedhinga hana li siti bua angoo agbugbulu ani lie, a ngagu 'i ani kuto, li efu holo naze bhú 'bhe ani, ani holo nazu tate e, kute ani

kpekpeke má ki ki ki! Ma ayo ka omukpata gba m̄-o me u gbe siti bua ango-o, engú bini, u ale pima.»

¹⁹ Yesu atsia apa pi uo me: «Ngayi okpála na naki-e, nabhuka bhú yi ade! Ma adú matá ne yi ngubula nedhinga madho? Ma akíbila matá yi ngubula nedhinga madho? Yi go ne ndili-e m̄ma ei.» ²⁰ Abhom̄-o, u ago ne ani pi Yesu. Li ndili-e au Yesu lie, siti bua adyiki ani má djigi djigi, ani aḡ 'i ani kuto! Ndili-e aholo nawawala kuto me efu nde ngaze bhú 'bh̄o ani. ²¹ Yesu atsia ayi 'dyi ndili-e me: «Kuo inde-e amene ani me-e ngubula kalanga madho?» Ani agie me: «Nayie bhú ndili li ani. ²² La di-e, siti bua ango-o ngaḡ 'i ani bhú djua di ne bhú 'ngu bh̄tsibh̄tsi ngú nabh̄o ani. Engú bini, i d̄ me m̄ nde ti da namene 'he-e, m̄ de dje mbo ndjinga ya, teteke ya!»

²³ Yesu agie pi ani me: «M̄ ngapa me: <I d̄ me m̄ nde ti da namene 'he.> La-a, nd̄ 'ngú hana ti da namene lie pi kpála inde ngabhuka ko.» ²⁴ Má gala kolo me-e, 'dyi ndili-e asula me: «Ma abhuka. La-a, go teteke ma, amba nabhuka gba ma-a kolo kpekpeke!» ²⁵ Li Yesu au bhiti okpála ngago ne holo li pápá gba o lie, ani atsia ambe bhú 'ndji siti bua me: «Ngam̄ siti bua inde ngagbite 'bh̄o ndili inde-e ne nanini 'dje ani, ma aha líli pi m̄ me: <Koto bhú ndili inde, la di-e, mo ogie matá lim̄ bhú ani beleḡ de bini!» ²⁶ Abhom̄-o, siti bua at̄ 'ue, ani adyiki ndili-e má djigi djigi, pipita-a, ani atsia akoto bhú ani! Ndili na bhobhoko ango-o, akolo maka kpála

inde akpi. Okpála bhelé adu apa me: «Ani akpi.»
²⁷ Engú bini, Yesu aholo 'kpa ani, ani a'e ani bhúla, ndili-e atsia alu malu.

²⁸ Pipita-a, Yesu ne omukpata gba e agie lio li bili u adu nadu li e-o. Nedhinga u adu lie ne uo titi o-o, u atsia ayi ani me: «Ka ni ya ti igini lie da nagbe siti bua bhomu-o bhú ndili inde-e lie de-e?»
²⁹ Yesu atsia agie pi uo me: «U ti da nagbe ngua bua bhomu-o bha bini ne mayo.»

Yesu akpo matá 'ngú pindji nakpi ne nazuku ka e

(Tsia bhú Mat. 17:22-23; di ne bhú Luk. 9:43b-45.)

³⁰ Li Yesu ne omukpata gba e ayie lie oo, u agulu ndu doto na Galilaya. Yesu du akunda de me okpála mbila bili inde ni adu li e de, ³¹ anga ani adu asuno pi omukpata gba e-o. Ani adu apa pi uo me: «U apú ngbángá Ndili gba kpála pi okpála, li okpála ango-o tsia bhéle ani. La-a, pita 'kpí bata-a, ani tsia zúku.»
³² Engú bini, omukpata du ambila nani ta engú bhomu-o de. U adu la di ne tsulu ngú nayi ani.

A ngebégbé da?

(Tsia bhú Mat. 18:1-5; di ne bhú Luk. 9:46-48.)

³³ Abhomu-o, Yesu ne omukpata gba e anu bhú gudhu na Kapalanauma. Pipita-a, u ali lie bhú 'ti bini me-e, Yesu atsia ayi omukpata gba e me: «Yi de igini ngamene kpekebhe sunda yi li kpadji-e pindji mangua 'ngú dho?»
³⁴ Engú bini, u andjili má bulu, anga li kpadji-e, u amene kpekebhe sunda o me a ngebégbé bhú ká o da-ie.
³⁵ Abhomu-o, Yesu adu kuto. Ani apo bhúla

omɔkpata ndjikpa ne ká bhisi-e de e masakpe. Aní atsia apa pí uo me: «Í dɔ me kpála bini nde akunda nadɔ kpála na kalanɔ-o, a ayo me aní dɔ píta ndɔ okpála hana, aní dɔ di bali gba ndɔ okpála koko hana.»

³⁶ Pípita-a, aní aha mboye ndíli, aní a'o aní bhú ká uo, aní abi aní sa 'kpa e, aní atsia apa pí uo me: ³⁷ «Kpála inde ngasia mboye ndíli maka bhende-e ka 'li ma-a, aní ngasia bhomɔ-o ma makpe. La di-e, kpála inde ngasia ma-a, aní sia bha bini ma kpi ma kpi de, engú bini, aní ngasia di bhomɔ-o 'Dyí ma inde atima ma ko.»

*Kpála inde i gɔ ní de-e, a ko naaní kpála
(Tsia bhú Luk. 9:49-50.)*

³⁸ Abhomɔ-o, Djaa apa pí Yesu me: «Mɔsuno, ya au kpála bini ngapandja osisiti bua ne 'li mɔ. Ya atsia ayoko aní, anga a ko sɔka ní de.» ³⁹ Engú bini, Yesu agie pí uo me: «Yi ayóko aní de, anga kpála inde amene ngamba 'ngú ne 'li ma-a, tí da napa kolo siti 'ngú lí ma pípita-a de. ⁴⁰ Padhá de, anga kpála inde i gɔ ní de-e, a ko naaní kpála. ⁴¹ Ma apa pí yi na paká me, kpála inde ngaha kópo na engu pí yi bini kabula me yi ne okpála gba Kilisito-o , aní asía makalá gba e masia.»

*Ongú inde ngato kpála bhú siti 'ngú-o
(Tsia bhú Mat. 18:6-9; di ne bhú Luk. 17:1-2.)*

⁴² Yesu atsia apa matá pí omɔkpata gba e me: «Kpála inde ngato sɔka odjedje ongisi inde ngabhuka ma inde-e bhú siti 'ngú-o, a pí aní ndjindji me u gí ngingí tangulɔ aní, amba u bhike aní bhú 'ngbé 'ngu. ⁴³ Í dɔ me 'kpa mɔ nde ngato

m̄ bhú siti 'ngú ngae-e, m̄ de kodho. A ndjindji pi m̄ nali bhú mukobho na d̄d̄uma ne koli 'kpa m̄ bini, ane mane nan̄ ka m̄ bhú djua na d̄d̄uma ne d̄d̄uma ne 'kpa m̄ bhisi hana. [44 *]

45 I d̄ di me 'dh̄ m̄ nde ngato m̄ bhú siti 'ngú ngae-e, m̄ de kodho. A ndjindji pi m̄ nali bhú mukobho na d̄d̄uma ne koli 'dh̄ m̄ bini, ane mane me u bhike m̄ bhú djua na d̄d̄uma ne d̄d̄uma ne 'dh̄ m̄ bhisi hana. [46 †] 47 I d̄ me li djila m̄ nde ngato m̄ bhú siti 'ngú ngae-e, m̄ de gbe. A ndjindji pi m̄ nali bhú Nā gba Ebhe-e ne koli li djila m̄ bini, ane mane me u bhike m̄ bhú djua na d̄d̄uma ne d̄d̄uma ne djila m̄ bhisi hana. 48 Oo, <okéké maka bangili inde ngaz̄ k̄te kpála mumu de, djua b̄b̄ul̄ la di-i de.†> 49 Padhá de, anga Ebhe alé nabhuka gba nd̄ okpála hana bhú djua, amba a kolo kpekpeke.

50 Nḡt̄ ne bádha 'he. Engú bini, i d̄ me a nde abolo, u ti da nagie matá kpokpo bh̄bhú ne ni? Nabhuka gba yi d̄ maka nḡt̄ inde i bolo de, yi d̄ la di ne guo 'ngú s̄nda yi.»

10

* **9:44** 9:44 Lukuluku inde-e, a bhú obhuku koko na didili u aye e bhú eli na giliki ade. [Oo, okéké maka bangili inde ngaz̄ k̄te kpála mumu de, djua b̄b̄ul̄ la di-i de.] † **9:46** 9:46 Lukuluku inde-e, a bhú obhuku koko na didili u aye e bhú eli na giliki ade. [Oo, okéké maka bangili inde ngaz̄ k̄te kpála mumu de, djua b̄b̄ul̄ la di-i de.] † **9:48** 9:48 Tsia bhú Isa. 66:24.

Nasuno pindji nagbo bhṣu o ne ɔlɔ
(Tsia bhú Mat. 19:1-12; di ne bhú Luk. 16:18.)

¹ Li Yesu ayie lie oo, ani anu bhú ndu doto na Yudaya, ayi 'ngu na Djɔludani. Bhiti okpála ago matá de ani. Ani aholo nasuno pi uo maka ani amemene lie-o. ² Abhomu-o, omuFalisai koko adyudyo lio de Yesu, ngu naholo ani li 'li e. Kaka-a, u atsia ayi ani me: «Lili gba ní-e aziba uu me bhoko gbo bhṣu e ne ɔlɔ gba e?» ³ Yesu atsia agie pi uo me: «Moidje aha nani pi yi li 'ngu bhomu-o mangua lili dho?» ⁴ U atsia apa me: «Moidje aha nani pi bhoko kpadji me ani ye balua ngu nagbo bhṣu o ne wala e, amba ani gie ani agba o.»

⁵ Engú bini, Yesu agie pi uo me: «Moidje aye nani lili bhomu-o pi yi ka kpéke 'ndji gba yi-o. ⁶ La li lilita-a, nedhinga li Ebhe abho ndu 'he lie hana-a <ani abho uo bhoko ne ɔlɔ.†> ⁷ <Kaka-a, bhoko a'ili ka 'dyi e ne 'hi e, ani tsia dhédhe li wala e, ⁸ ndu uo bhisi hana kólo koli kpála bini.†> Abhomu-o, uo matá okpála bhisi ade. Engú bini, u akolo koli kpála bini. ⁹ Kaka-a, a ayo de me kpála-kuti gbo bhṣu uo de, anga Ebhe akpetse uo ngae.»

¹⁰ Li Yesu ne omakpata gba e agie lio lie li bili u adu nadu li e, u atsia ayi ani li 'ngu ango-o. ¹¹ Yesu apa pi uo me: «† du me bhoko bini nde a'e wala e ngu naha ɔlɔ koko-o, ani a'o bhomu-o ká wala e na kalanu-o ngu nakanda ɔlɔ koko. ¹² † du la di me ɔlɔ nde atse 'ko e ngu naha bhoko

† **10:6** 10:6 Tsia bhú Dje. 1:27, 5:2. † **10:8** 10:7-8 Tsia bhú Dje. 2:24.

koko-o, ani a'o bhomu-o ká 'ko e ngú nakunda bhoko koko.»

Yesu atuko bisagu pí 'ndji ongisi

(Tsia bhú Mat. 19:13-15; di ne bhú Luk. 18:15-17.)

¹³ Abhomu-o, okpála adu ago ne ongisi gba o me Yesu 'o 'kpa e pí uo, ne natuko bisagu pí uo. Engú bini, omakpata ake 'ngú lio pí okpála angoo-o. ¹⁴ Yesu au lie mo-o, bua ani ake, ani atsia apa pí omakpata gba e me: «Yi 'o ongisi me, u go li pabili ma nde li e-o, yi ayoko uo de. Padhá de, anga Nau gba Ebhe-e , a pí obhende maka uo ko. ¹⁵ Ma apa pí yi na paká me, kpála bhende nabhuka gba e nde maka bhe gba ndili ade-e, kpála angoo-o ti da nali bhú Nau gba Ebhe-e belegu de bini.» ¹⁶ Abhomu-o, Yesu adu abi ongisi bhomu-o, ani atsia adu atuko bisagu pí uo me ani nde nga'o 'kpa e pí uo.

Bhulu tia bini ayi 'ngú pindji mukobho na duduma

(Tsia bhú Mat. 19:16-30; di ne bhú Luk. 18:18-30.)

¹⁷ Li Yesu adu a'e ne enu lie, bhoko bini ago ne holo nabhaka ani, ani akikita lipuku e kuto kala ani. Ani atsia ayi ani me: «Musuno na babadha, a ayo me ma mene pí ngú nasia mukobho na duduma-a?» ¹⁸ Yesu atsia apa pí ani me: «Ka ni mu nga'i ma lie me bádha kpála-a? Bádha kpála belegu ade bini, bha bini Ebhe kpi e kpi. ¹⁹ La-a, mu mbila olili-e ndjindji: <Mo obholo kpála de, mo osí ne elo, i du di-e bhoko gba kpála koko de, mo ozi 'he de, mo opa 'ngú li kilí mu bhú

djila okpála ne eu de, mo ozi kpála bhú nyali de, manga 'dyi mu ne 'hi mu mamanga.†»

²⁰ Bhoko ango-o apa pi ani me: «Musuno, nayie bhú ndili li ma-a, ma amene ndu olíli bhomu-o hana.» ²¹ Yesu atsia ani ne mukunda hana. Ani atsia apa pi ani me: «Mo oneke bha koli 'he bini. Nunu, tsindji ndu 'he inde mu nde ne e hana, amba mu ha tiatia pi obhulu ndibhili, mo osia tia abhulá. Pipita-a, go kpata ma.» ²² Engú bini, nedhinga li bhoko ango-o adje lie mo-o, ani atu 'ndji e ne kuto, ani atsia agie lie ne babuma naali, anga tia adu nani ka ani bhelé.

²³ Abhomu-o, Yesu atsia omukpata gba e inde adu me u nde asa ani ngbalina-o. Ani apa pi uo me: «A ko kpeke da 'ngú pi obhulu tia ngú nali bhú Nau gba Ebhe-o!» ²⁴ Abhomu-o, omukpata atsia angamba ka eli ango-o. La-a, Yesu apa mata pi uo me: «Odi ma, a ko kpeke da 'ngú ngú nali bhú Nau gba Ebhe-o! ²⁵ Da nali ka samo* li gudho musana kpekpeke. A la mata kpekpeke naali pi bhulu tia nali bhú Nau gba Ebhe-o.» ²⁶ Omukpata angamba mata bha naali, u atsia adu apa sunda o me: «I du mo-o, a ti da nakobho da?» ²⁷ Yesu atsia uo má suu, ani atsia apa pi uo me: «Pi okpála-a, a ko kpeke da 'ngú. Engú bini, pi Ebhe-e, a ko kpeke da 'ngú de, anga ani ti da namene ndu 'ngú hana.»

²⁸ Abhomu-o, Piele apa pi ani me: «Djedje nga, ya a'o ndu 'he hana ngú nakpata mu.» ²⁹ Yesu

† **10:19** 10:19 Tsia bhú Eki. 20:12-16; di ne bhú Det. 5:16-20.

* **10:25** 10:25 Enu inde li Yesu abhu lie si-e a ko samo. Li pápá gba uo oo enu inde adu nani ngbéngbé ne samo.

atsia apa pi ani me: «Ma apa pi yi na paká me, kpála inde a'o ka eti gba e, inde a'o ka ondaise e na obhosibhosi, i du di-e obhende na olisilisi, inde a'o ka 'hi e, i du di-e 'dyi e, i du di-e ongisi gba e, i du di-e edyi gba e ngubula ma, la di ne ngubula Bádha Ngali-e , ³⁰ kpála angoo asía mbia inde-e bhùtsibhùtsi kámá bini: oeti, ondaise na obhosibhosi ne obhende na olisilisi, oehi, ongisi, la di ne oedyi bhú dabili bini ne olikabhu. Aní tsia sía di bhú nedhinga inde ngago-o, mukobho na duduma. ³¹ Engú bini, bhelé na okpála inde u ngau o maka okpála na akalanu mbia inde-e, akólo okpála na asidi, li obhende u ngau o maka okpála na asidi mbia inde-e kólo okpála na akalanu.»

Yesu akpo 'ngú bhùtsibhùtsi na bata pindji nakpi ne nazuku ka e

(Tsia bhú Mat. 20:17-19; di ne bhú Luk. 18:31-34.)

³² Li Yesu ne omukpata gba e a'e ibili ne enú lie ngú nanu bhú Yelusalema-a, ani akø pi uo kalanu. Omukpata-a adu angamba. Obhende adu akpata uo-o, adu ne tsulu, Yesu aha matá omukpata gba e ndjikpa ne ká bhisi titi o, ngú nagama 'ngú pi uo. Aní atsia aholo akpokpo 'ngú pi uo pindji ongú inde akólo li ani-o. ³³ Aní apa pi uo me: «Yi dje nga 'ngú inde. Ní adji bhú Yelusalema. Oo, u apú ngbángá Ndili gba kpála pi ongbengbe odimandø gba Ebhe ne omusuno na líli-o . U akódho 'ngú gba ani me ani kpi bha makpi. Pipita-a, u tsia pú ani pi omupagano. ³⁴ U ató pádha li ani, u akú ngusu li ani, u abhí ani

ne fimbo, u tsia bhéle ani. Engú bini, pita 'kpí bata-a, ani tsia zúku.»

*Mayo gba Djaki ngauo ne Djaa
(Tsia bhú Mat. 20:20-28.)*

³⁵ Pipita-a, Djaki ngauo ne Djaa , ongisi gba Djebedayo, adyudyo lio de Yesu. U atsia apa pi ani me: «Musuno, ya ngakunda me mene pi ya engú inde ya adji ayo e ka m̄-o.» ³⁶ Yesu atsia ayi uo me: «Yi akunda me ma mene pi yi ni?» ³⁷ U agie pi ani me: «Ziba pi ya nadulú bhú Nau gba m̄ na sangu-o , bini li pá 'kpa m̄ na kokpa, koko li pá 'kpa m̄ na gali.» ³⁸ Engú bini, Yesu atsia apa pi uo me: «Yi mbila ehe inde yi ngayo e de. Yi ti da nandji kópo na likabhu inde ma andjí e uu? Yi ti da nasia batisimo na likabhu inde ma asía e uu?» ³⁹ U atsia agie pi ani me: «Ya ti da namemene.» Do Yesu pi uo me: «A moko, yi andjí kópo na likabhu inde ma andjí e-o, yi sía di batisimo na likabhu inde ma asía e-o. ⁴⁰ Engú bini, ma ti da napa ngama de me a adúlú li pá 'kpa ma na kokpa ne me a adúlú li pá 'kpa ma na gali da-ie de. Obili ango-o, a pi obhende li Ebhe aleke pi o ko.»

⁴¹ Li omakpata ndjikpa bhe koko adje engú li Djaki ne Djaa ayo e lie, u atsia ake 'ngú lio pi uo. ⁴² Abhom̄-o, Yesu a'i uo de e, ani atsia apa pi uo me: «Yi mbila hana me ongámási na doto inde ngau pí omaha o ne kpéke. La di-e, ongbengbe okpála ngaha okpekpeke líli pi omaha o. ⁴³ Engú bini, a ayo de me adu akodho 'kpí sunda yi mo-o de. I du me kpála bini nde akunda nadu 'ngbé kpála bhú ká yi-e, a ayo me ani du kpála na kulu

gba yi-o. ⁴⁴ I du me kpála bini bhú ká yi nde akunda nadu kpála na kalanu-o, a ayo me ani du bali gba ndu okpála koko hana. ⁴⁵ Padhá de, anga ngama Ndili gba kpála ma go nani de me okpála du amene kulu lio pi ma-a de. Engú bini, ma ago mangbo ngú namene kulu lima pi okpála, di ne ngubula nagbegbe okpála bhelé bhú bali ne lá ma makpe.»

Yesu akobho Balatimé, kpála i u 'kpí de (Tsia bhú Mat. 20:29-34; di ne bhú Luk. 18:35-43.)

⁴⁶ Pipita-a, Yesu akolo bhú gudhu na Djeliko. Li Yesu ne omukpata gba e, la di ne bhiti okpála adu akoto lie oo, u abhaka kpála bini i u 'kpí de me ani nde adu dengo 'hi kpadji. A adu 'li ani me Balatimé, a adu ndala Timaya. Ani adu me ani nde ngayoyo 'he. ⁴⁷ Nedhinga ani adje lie me a ko Yesu, kpála na Nadjaleta-a, ani aholo asusula me: «Yesu, Ndili gba Davidi, dje nga mbo ndjinga ma!» ⁴⁸ Bhiti okpála adu ambembe bhú 'ndji ani me: «Gbite 'bhø mu!» Engú bini, ani aholo la matá asusula kpekpeke me: «Ndili gba Davidi, dje nga mbo ndjinga ma!»

⁴⁹ Abhomu-o, li Yesu adje lie, ani alu, ani atsia apa me: «Yi 'i ani ei.» U atsia a'i kpála i u 'kpí de ne napa pi ani me: «Atou! Yie bhúlá. Ani nga'i mu.» ⁵⁰ Abhomu-o, ani abala 'kpa li koti gba e-o, ani a'ulu má ngudha, ani atsia ago abhaka Yesu. ⁵¹ Abhomu-o, Yesu atsia ayi ani me: «Mo okunda me ma mene pi mu ni?» Kpála i u 'kpí de-e agie pi ani me: «Musuno, ma akunda me ma u matá 'kpí.» ⁵² Yesu atsia agie pi ani me:

«Nn̄n̄, nabhuka gba m̄-o akobho m̄ akobho.»
Má gala kolo me-e, ani aholo au 'kpí, ani atsia
ad̄ akpata Yesu li kpadji-o.

11

Yesu ali bhú Yelusalema
(*Tsia bhú Mat. 20:29-34; di ne bhú Luk. 18:35-43.*)

¹ Li u akolo lie de Yelusalema-a, masikpe de okuti na Betefadje ne Betania-a, u akolo pí eta na ondula na Olive. Yesu atima om̄kpata bhisi bhú ká om̄kpata gba e akalan̄. ² Ani atsia apa pi uo me: «Yi n̄ bhú kuti inde kala yi aoo. Yi akólo lie oo me-e, yi abháka me u nde agbite ndili punda* inde li kpála bini dh̄k̄ nga pí e de. Yi bhulu ani, amba yi go ne ani. ³ I d̄ la me kpála bini nde ayi yi me: «Yi ngabhulu ani ngú ni?» Yi de gie pi ani me: «Ngámá ne gum̄ ani. Engú bini, ani agie bha ani si mbia inde.»»

⁴ Abhom̄-o, u an̄, u atsia abhaka ndili punda me u nde agbite ani akilidjo, de 'bh̄ bhoti bini li 'hi kpadji. U atsia abhulu ani. ⁵ U ad̄ abhulu ani lie, okpála koko bhú ká obhende ad̄ oo, ayi uo me: «Yi ngamene bhom̄-o ni? Yi ngabhulu ndili punda bhom̄-o ngú ni?» ⁶ Om̄kpata agie pi uo maka li Yesu apa lie pi uo-o. Okpála ango-o atsia a'o uo me u n̄n̄. ⁷ Abhom̄-o, om̄kpata-a atsia ago ne ndili punda-a pi Yesu, u apa obongo gba o pí 'ngb̄ ani. Abhom̄-o, Yesu atsia ad̄ pépé. ⁸ Okpála bhelé apa obongo gba o li kpadji, okoko

* **11:2** 11:2 En̄ inde si-e a ko piga 'n̄ maka punda, uo la ndundundu u bibi di okpála.

apa okpálá inde u akodho e bhú bili-o. ⁹ Okpála bhende adu adhuku kala Yesu ne obhende adu akpata ani-e, adu asusula me:

«Ebhe heni!

A ayo me Ebhe tuko bisagu pí kpála inde ngago ne 'li Ngámá ko! †

¹⁰ A ayo me Ebhe tuko bisagu pí nau inde ngago, nau gba ogbi ní Davidi ko!

Ebhe Apí 'Kpí heni!»

¹¹ Abhomu-o, Yesu anu bhú gudhu na Yelusalema, ani atsia ali bhú 'ngbé 'ti Ebhe gba omaYuda-o. Pita natsia 'kpí ka ani lingo e hana, ani atsia anu ne omukpata gba e ndjikpa ne ká bhisi bhú Betania, anga adu me ekpí nde ngabi.

Yesu atụ pọdjọ li ndula na figi

(Tsia bhú Mat. 21:18-19.)

¹² Pita ekpí bhomu-o, u adu akoto lie bhú Betania-a, Yesu aholo nadjẹ gumu. ¹³ Ani au ndula na figi inde adu bhú e ne kpákpá-a de e tsutsu. Ani atsia anu ngú natsia 'kpí bhú ndula ango-o atigala ni u lílí bhúbhú. Engú bini, ani akolo lie dede-e, ani au bha bhiti kpákpá-o. Padhá de, anga adu nedhinga nali kaka de.

¹⁴ Abhomu-o, Yesu atsia atụ pọdjọ li ndula na figi-e ne napa me: «Mu lí matá líli inde li kpála ti da nazụ e belegu de bini!» Omukpata gba ani adje 'ngú ango-o hana.

† **11:9** 11:9 Tsia bhú Ets. 118:25-26.

Yesu atsambala obhulũ natsindji 'he bhú 'ngbé 'ti Ebhe gba omaYuda

(Tsia bhú Mat. 21:12-17; ne bhú Luk. 19:45-48; di ne bhú Dja. 2:13-22.)

¹⁵ Abhomu-o, u atsia agie matá lio bhú Yelusalema. Li Yesu ali lie bhú 'ngbé 'ti Ebhe gba omaYuda-a, ani aholo natsambala okpála inde adu atsindji 'he, ne obhende adu akala 'he oo-o. Ani atumba omisa gba okpála inde adu ayipa falanga, di ne okiti gba obhende adu atsindji obebhe-o kuto. ¹⁶ Yesu 'o nani kpála bini akodho 'kpí ne ehe bini na mase bhú 'ngbé 'ti Ebhe de. ¹⁷ Pipita-a, ani aholo asuno, ne napa pi uo me: «U aye bhú Bhuku gba Ebhe-e me, Ebhe apa me: <U a'í eti gba ma-a me eti nayo Ebhe pi ndu opiga hana.> Engú bini, ngayi-e, yi adji, a atsia akolo bili gba obhulu 'zi!†» ¹⁸ Ongbengbe odimandø di ne omusuno na líli adje engú inde li Yesu amene e-o. U atsia aholo agili kpadji ngú nabhøø ani. Engú bini, u adu akpe ani, anga ndu okpála hana adu angamba li nasuno gba ani-e mangamba. ¹⁹ Akolo lie tagolo-o, Yesu ne omukpata gba e akoto bhú gudhu-o.

Yesu asuno pindji nadu ne nabhuka na kpekpeke

(Tsia bhú Mat. 21:20-22.)

²⁰ Kòkpí má bhø-o, Yesu ne omukpata gba e a'e ne enu. U akolo lie li bili li Yesu atu pødjo lie li ndula na figi-e, omukpata gba ani au me ndula ango-o a'ulu hana, akolo makolo bha bini

† 11:17 11:17 Tsia bhú fsa. 56:7; di ne bhú Djlm. 7:11.

li osisie. ²¹ Abhomu-o, Piele abhundja engú inde li Yesu apa lili e li figi-o, ani atsia apa pi Yesu me: «Musunu, tsitsia nga, ndula na figi inde mo otu pɔdjɔ lie a'ulu hana!» ²² Yesu atsia apa pi omukpata gba e me: «Yi du ne nabhuka bhú Ebhe! ²³ I du me yi nde apa pi eta inde-e me: <Yie sii, amba mu nu gu 'i mu bhú 'ngbé 'ngu-o, Ebhe méne pi yi, i du me yi nde ne bua na bhisi bhisi ade ko. Engú bini, a ayo la me yi bhuka me Ebhe améne mamene.> ²⁴ Kaka-a, ma apa pi yi me: ndu ehe hana yi ayó e bhú mayo-o, yi bhuka me yi asia ehe ango asia. Abhomu-o, ehe ango tsia méne lie pi yi. ²⁵ Engú bini, nedhinga yi nde lie ngayo Ebhe-e, i du me yi nde ne engú pi kpála-a, yi de mbu ngaiza li ani, amba 'Dyi yi inde abhúla-a 'e di osisiti 'ngú gba yi o. [²⁶ †]»

A ngaha angu pi Yesu da?

(Tsia bhú Mat. 21:23-27; di ne bhú Luk. 20:1-8.)

²⁷ Yesu ne omukpata gba e agie lio bhú Yelusalema. Li Yesu adu adholo lie bhú 'ngbé 'ti Ebhe gba omaYuda-a, ongbengbe odimandɔ gba Ebhe, ne omusunu na líli, di ne obhelesi okpála ago de ani. ²⁸ U atsia ayi ani me: «A aha kpadji pi mu ngú namene ongú inde-e da? A aha la di angu pi mu ngú namemene da?» ²⁹ Yesu atsia agie pi uo me: «Ma adji ayi yi li koli engú bini, i du me yi nde agie engú muma tété-e, ma atsia pá

† **11:26** 11:26 Lukuluku inde-e, a bhú obhuku koko na didili u aye e bhú eli na giliki ade. [Engú bini, i du me yi nde mbu li okpála koko de-e, 'Dyi yi inde abhúla-a 'é di osisiti 'ngú inde yi amene e de.]

pi yi me ma ngamemene ne mangua angu dhoie. ³⁰ Aha kpadji pi Djaa ngú nabatisa okpála da? Ne me a ko Ebhe, ne me a ko okpála? Yi gie engú muma tété.»

³¹ U aholo amene kpekebhe sunda o me: «I du me ni nde apa me, aha kpadji pi Djaa ne Ebhe-e, ani yí ní me, i du mo-o, ka ni ní bhuka la nani Djaa lie de-e? ³² Engú bini, ní ti da nale napa me: <Aha kpadji pi Djaa ne okpála-a?>» (U apa nani mo-o anga u adu adje tsulu ka bhiti okpála-o. Padhá de, anga ndu okpála hana adu abhundja me Djaa ne polofeta na kukulu.) ³³ Abhomu-o, u agie pi Yesu me: «Ya mbila de.» Yesu atsia agie pi uo me: «A ndjindji, ngama di-e, ma apa pi yi de me a aha angu muma ngú namene ehe inde-e da-ie de.»

12

Gbitaku pindji osisiti okpála namene kulu bhú 'dyi vino

(Tsia bhú Mat. 21:33-46; di ne bhú Luk. 20:9-19.)

¹ Abhomu-o, Yesu aholo nakpokpo 'ngú pi uo bhú ogbitaku me: «Kpála bini alu nani ngu vino, ani asa ngongo-o hana ne aga. Ani adji edú ngú napi olíí-e bhúbhú, ani atsia ayiki 'ndjá 'ti abhúlá bhúbhú ngubula nalila edyi-o. Pipita-a, u adje lio ne okpála ngú namene kulu bhú 'dyi-o, amba o du agbó bhusu o ne uo li nguwa-o. Abhomu-o, ani atsia atapa dhuku.»

² Nedhinga li nguwa abhele lie, ani atima kpála bini na kulu agba okpála ango-o me u ha nguwa

bhe gba ni-e pi ni haha. ³ Okpála namene kulu bhú ngu vino aholo kpála ango-o, u abhi ani má kpú! U atsia agie ani ne mbulu 'kpa e padhá. ⁴ Bhulu 'dyi-e atima matá kpála na kulu koko bini, bhobhomu-o di-e, u abhi ani li 'ndji e, u atsia asosobho ani. ⁵ Bhulu 'dyi-e atima matá kpála koko bini, u abhelo bha ibili bhobhomu-o mabhelo. Pipita-a, bhelé na okpála koko-o, u abhi uo. Okoko-o, u abhili uo.

⁶ A atigala nani ibili ka bhulu edyi-e bha ne koli kpála bini ani ti da natima e, bha ndili na bhobhoko gba ani bini na 'kpú bua ani-o. Ali soso hana-a, ani aha ani, ani atsia atima ani agba uo oo-o. Do ani de-e: <U amánga ndili gba ma-a mamanga.> ⁷ Engú bini, okpála ango-o apa sunda o me: <Yi tsia nga la ndju kpála inde atigala galikpe ne edyi-o. Yi gógo! Ní bhelo ani, amba edyi-e kolo ibili pi ní.> ⁸ U aholo ani, u abhelo ani, u atsia abhike kuo ani alingo 'dyi.» ⁹ Abhomu-o, Yesu atsia ayi me: «Mbia inde-e, bhulu 'dyi-e améne pi? Ani agó, ani bhili okpála namene kulu bhú 'dyi-e hana. Pipita-a, ani há edyi-e, ani tsia pú pi okpála koko. ¹⁰ Yi atanga bha ndju Bhuku gba Ebhe-e uu? Li bili inde u aye lie me: <Teme inde li okpála nayiki eti-e abhike e, akolo teme inde abi eti-e libhomu.

¹¹ Ebhe Ngámá amene engú bhomu-o ngae.

Bhú djila ní-e, a ko engú na ngbéngbé!†>>

¹² Li Yesu apa lie mo-o, obhulu yala gba ani-e atsia adu agili naholo ani. Padhá de, anga u adu ambila ndjindji me ani apa gbitaku bhomu-o pi

† 12:11 12:10-11 Tsia bhú Ets. 118:22-23.

o. Engú la bini, u adu adje tsulu ka bhiti okpála. Abhomu-o, u a'o ká ani, u atsia agbida.

Engú pindji nakala mandjandja gba 'ngbé ngámá Kaisala

(Tsia bhú Mat. 22:15-22; di ne bhú Luk. 20:20-26.)

¹³ Abhomu-o, u atima té omuFalisai di ne okpála gba Elode me u nu agba Yesu, u gama 'ngú ne ani, amba u holo ani li 'li e. ¹⁴ U ago, u atsia apa pi ani me: «Musunu, ya ngambila ndjindji me mu ngapa kukulu 'ngú. Mu ne tsulu kpála belegu ade bini. Mu tsia di engbé gba kpála bini de. Engú bini, mu ngasuno engú gba Ebhe-e pi okpála bhú kukulu 'ngú. Lili aziba pi? U kala mandjandja gba Kaisala, 'ngbé ngámá na doto na Loma, ne me u akála de. A ayo me ya kala, ne me ya akála de?» ¹⁵ Yesu ambila kali gba uo lie, abhomu-o, ani atsia ayi uo me: «Yi ngale ma ngubula ni? Yi go nga muma ne lí falanga bini, ma tsia!» ¹⁶ U ago ne lí falanga bini pi ani. Ani atsia ayi uo me: «Kulu kpála di ne balua inde pépé inde-e, a ko naa da?» U agie pi ani me: «A ko naa Kaisala.» ¹⁷ Abhomu-o, Yesu atsia apa pi uo me: «Yi ha ehe bhende gba Kaisala-a pi Kaisala, amba yi ha la di bhende gba Ebhe-e pi Ebhe.» U atsia adu nangamba li ani naali.

Engú pindji nazuku ka okpála

(Tsia bhú Mat. 22:23-33; di ne bhú Luk. 20:27-40.)

¹⁸ Abhomu-o, oSadukai ago de Yesu. (Ngauo-o, u ziba nani naao de me okpála inde amu-o azúku mazuku-o de.) U atsia ayi Yesu me: ¹⁹ «Musunu,

Moidje aye nani líli pi ní me: «Í dũ me kpála bini nde akpi, aní 'o ká wala e me u nde zu ne aní de-e, a ayo me ndai aní ha ɔkɔ ang-o, amba aní zu ndíli pi ndai e inde akpi ko.» ²⁰ La-a, a adũ nani obhosi mananika bhú piga bini. Bhende na kalanũ-o aha ɔlɔ, aní akpi padhá me aní nde zu de. ²¹ Bhende na bhisi aha ɔlɔ ang-o, aní akpi padhá me aní nde zu de. A akolo bhadi lí kute bhende na bata moko. ²² Ndũ obhosi bhomũ-o mananika hana amu me u nde zu de. Pita ndũ uo hana-a, ɔlɔ-o atsia akpi di. ²³ Lí 'kpí lí okpála inde amu-o azúku lie, ɔlɔ ang-o adú naa da? Padhá de, anga ndũ uo mananika hana aha nani ani!»

²⁴ Abhomũ-o, Yesu atsia agie pi uo me: «Yi angita, anga yi mbíla Bhuku gba Ebhe-e de, yi mbíla la di angu gba Ebhe-e de. ²⁵ Padhá de, anga lí okpála inde amu-o azúku lie, u há lío de. Engú bini, u adú íbili maka oandjelu abhúlá. ²⁶ Lí 'ngú bhende atsia nazuku ka okpála-a, yi tanga nga bhuku gba Moidje, lí bíli inde aní akpo 'ngú lie pindji tsá 'pó inde adũ atsi-e di? Lí bíli bhomũ-o, u aye me Ebhe apa pi aní me: «Ma ne Ebhe gba Abalahama, Ebhe gba Isaka, Ebhe gba Yakobho.» ²⁷ Ebhe ne Ebhe gba okpála inde amu-o ade. Engú bini, aní mangbo ne Ebhe gba okpála inde ɔũ ko. Yi angita bha ndjũ na paká paká.»

Líli inde ane ne engbé

(Tsia bhú Mat. 22:34-40; di ne bhú Luk. 10:25-28.)

²⁸ Mũsuno bini na líli gba Moidje adje uo nedhinga u adũ amene kpekebho lie-o. Aní atsia

au di maka li Yesu agie 'ngú lie pi oSadukai ndjindji-o. Abhomu-o, ani adyudyo lie, ani atsia ayi Yesu me: «Líli inde ane ne engbé-e ngae dho?» ²⁹ Yesu agie pi ani me: «Líli na bini inde ane ne engbé-e ngae inde: ‹Isalaele, djedje nga! Ebhe, Ngámá gba ní-e bha ne koli Ngámá kpi e kpi. ³⁰ A ayo me kúnda Ebhe, Ngámá gba mu-o ne bua mu hana, ne mukobho gba mu-o hana, ne mabhundja gba mu-o hana, la di ne angu gba mu-o hana.›† ³¹ Bhende na bhisi-e ngae inde: ‹A ayo me kúnda kilí mu maka mo okúnda limu lie makpe ko.†› Líli bini ade inde ane obhobhomu-o ne engbé.»

³² Abhomu-o, musuno na líli-e apa pi ani me: «A ndjindji naali, Musuno! Mo opa paká. Ani bha ne koli Ngámá ngae kpi e kpi, Ngámá koko ade, bha bini ani. ³³ La di-e, a ayo me kpála kúnda ani ne bua e hana, ne imbilangu gba e hana, ne angu gba e hana, amba ani kúnda la di kilí e maka ani akúnda lie lie makpe ko. Bhobhomu-o ndjindji ane natsulu oenu pi Ebhe di ne obhe u ahaha e pi ani ko.» ³⁴ Li Yesu au lie me ani agie 'ngú ne imbilangu-o, ani atsia apa pi ani me: «Mu de Nau gba Ebhe-e tsutsu ade.» Pipita-a, kpála bini le matá nayi Yesu belegu de bini.

Masiya ne ngámá gba Davidi

(Tsia bhú Mat. 22:41-46; di ne bhú Luk. 20:41-44.)

† **12:30** 12:30 Tsia bhú Det. 6:4-5. † **12:31** 12:31 Tsia bhú Lev. 19:18.

³⁵ Li Yesu adu asuno lie pi okpála bhú 'ngbé 'ti Ebhe gba omaYuda-a, aní atsia adu ayi me: «Lele pi lí omusuno na líli gba Moidje ti da napa lie me Masiya ne ndili gba Davidi-e? ³⁶ Padhá de, anga ngaani Davidi makpe-e bhú nateteke gba Bu Bhobua apa nani me:

«Ebhe Ngámá apa pi ngámá gba ma-a me:

Du lí pá 'kpa ma na kokpa,

akolo lí nedhinga inde ma a'ó obhulu yala gba mu-o lie

sa 'dhu mu ko.»†

³⁷ Davidi ngae makpe nga'i Masiya me «Ngámá.» Lele pi aní nde la lie ne ndili gba Davidi-e?» Bhiti okpála na bhibhiti adu nadje aní ne djali naali.

Yi lila liyi ka omusuno na líli gba Moidje malila (Tsia bhú Mat. 23:1-36; di ne bhú Luk. 20:45-47.)

³⁸ Yesu adu apa pi okpála bhú nasuno gba e me: «Yi lila liyi ka omusuno na líli gba Moidje malila. Padhá de, anga ngauo-o, u kunda bha nadhaku ne ondjandja yambu, di ne me u du nayi o maka ongámási lí obili inde lí okpála apepekobhe bhúla o lí e-o. ³⁹ U kunda bha nadulu pí odabili na akalanu bhú oeti nadje líli gba Moidje , di ne pí odabili na akalanu bhú da oanokomia. ⁴⁰ U ngabha oehe gba oekesi na olisilisi. U ngayo Ebhe ngengele ngubula me okpála u o. Kaka-a, u asía mangimbo ane bhende gba okpála koko mane.»

† **12:36** 12:36 Tsia bhú Ets. 110:1.

Makiso gba ɔkɔ bini na ɔɔlɔ

(Tsia bhú Luk. 21:1-4.)

⁴¹ Yesu adu li bili li sanduku na makiso na 'ngbé 'ti Ebhe-e adu nadu li e, ne li pápá na abhúbhúla. Yesu adu atsia maka li okpála adu na'o makiso lie bhúbhú-o. Kambi obhulu tia adu na'o tia bhelé. ⁴² Engú bini, ɔkɔ bini na ɔɔlɔ, bhulu ndibhili ago. Aní aha bha naae djedje lí falanga bhisi padhá má kpikili! ⁴³ Abhomu-o, Yesu a'i omukpata gba e-o. Aní atsia apa pí uo me: «Ma apa pí yi na paká me, ɔkɔ na ɔɔlɔ inde naae ne bhulu ndibhili inde-e, aha makiso ane ndu okpála inde a'o makiso bhú sanduku inde-e hana. ⁴⁴ Padhá de, anga ndu okoko hana, u aha tia bhende u nde ne gumu e ade ko. Engú bini, ngaani, bhú ndibhili gba e, aní aha ndu bhende adu ka e, inde aní adu akobho li e hana-o.»

13

Yesu apa me 'ngbé 'ti Ebhe gba omaYuda atúko kuto

(Tsia bhú Mat. 24:1-2; di ne bhú Luk. 21:5-6.)

¹ Nedhinga li Yesu adu akoto lie bhú 'ngbé 'ti Ebhe gba omaYuda-a, suka omukpata gba aní bini atsia apa pí aní me: «Musuno, tsitsia nga! Ae mangua babadha ka oteme dho! Ae mangua babadha ka oeti dho!» ² Yesu atsia agie pí aní me: «Mo ou ongbengbe 'ti inde ayiki lie inde-e au? Oteme bhomu-o, susuka bini tígala pí kilí e de. Ndundu hana atúko kuto.»

Engú inde akólo kala sokpí-o

(Tsia bhú Mat. 24:3-14; di ne bhú Luk. 21:7-19.)

³ Li Yesu adu lie pí eta na ondula na Olive bhúla 'ngbé 'tí Ebhe gba omaYuda-a, Piele, Djaki, Djaa ne Andili adu ne aní titi o. U atsia ayí aní me: ⁴ «Pa nga pí ya me engú angó-o akólo nadho? Ehe inde asúno la di me ndu 'ngú hana adji andjia adú ní?»

⁵ Abhomu-o, Yesu aholo napa pí uo me: «'E-e! Kpála bini apíte yi de! ⁶ Okpála bhelé agó amene engú ne 'li ma ne napa me: <Ma ne Masiya !> U tsia píte okpála bhelé. ⁷ Nedhinga yi adjé ngali na oegú di ne dhukudhuku na oegú lie, yi adjé tsulu de, anga a ayo me oengú angó-o kolo. Engú bini, adú nga bhomu-o sokpí-e de. ⁸ Padhá de, anga okpála na kuti bini atí 'gú li okpála na kuti koko. Ngámá na kuti bini atí 'gú li ngámá na kuti koko. Oadjigidjo na ngbengbengbe adyíki doto li obili ngangá. Ehe nazu mazu dú ka okpála belegu de bini. A adú maka li bhú 'bu elə azuzu lie kala nazu ka e-o.

⁹ 'E-e! Yi lila liyi malila. Padhá de, anga okpála agbé yi bhú ngbanga kala ongámási, di ne abhú oeti nadje líli gba Moidje . U abhí yi, u apándja yi kala okpála natsia 'kpí li ndu doto di ne kala ongbengbe ongámási ngubula ma, amba yi kpokpo 'ngú gba ma kala uo. ¹⁰ Padhá de, anga a ayo ngaiza me u kpokpo Bádha Ngali pí ndu opiga hana. ¹¹ Li nedhinga u anú ne yi lie kala ongámási ngú nakodho 'ngú gba yi-e, bua yi agúku de me ní apá pí-ie de. Engú bini, engú inde akóto bhú 'bhə yi li nedhinga bhomu-o, yi de pa bha e. Padhá de, anga engú yi apá e yíe ka yi de. Engú bini, ayíe ka Bu Bhobua .

¹² Kpála apú ndai e na bhobhoko me u bhele ani. 'Dyi ndili améne bhadi moko li pabili gba ndili gba e. Li ongisi kólo obhulu yala gba odyi o, u tsia pú uo me u bhili uo. ¹³ Ndụ okpála hana ayála yi kabula 'ngú gba ma. Engú bini, kpála bhende alú kpekpeke akólo li soso-o, akóbho ngae.»

Likabhu na ngbéngbé inde akólo kala sokpí-o
(*Tsia bhú Mat. 24:15-28; di ne bhú Luk. 21:20-24.*)

¹⁴ «Yi aú kpála inde u a'i e me <Siti bhulu nabhelo kuti-e†> adu li bili inde i ti de me ani du lie de-o. (A ayo me kpála atanga bhuku inde-e, ko mbolimboli ndjindji!) Abhomu-o, obhende adú abhú Yudaya-a, a ayo me u kpe apí oeta. ¹⁵ Kpála inde adú apí 'ngbu 'ti-e, a ayo de me ani ko ngú nanu abhú 'ti gba e naha 'he bini-e de. ¹⁶ Kpála bhende adú abhiye-e, a ayo de me ani gie lie naha bongo gba e de. ¹⁷ Li 'kpí angoo, a adú likabhu na ngbéngbé pi olisi na 'bhi di ne obhende li ongisi adu andji 'ka o-o! ¹⁸ Yi yo Ebhe ngubula me engú angoo akólo li nedhinga na zini de.

¹⁹ Padhá de, anga oekpí angoo adú oekpí na likabhu u u nga ngua e de, nayie maka li Ebhe abho doto lie nakolo pi mbia inde. La di-e, u ú matá ngungua de. ²⁰ I dú me Ngámá gbétole oekpí angoo de-e, kpála bini de tí da nadu bhú mukobho de. Engú bini, ani agbetole oekpí angoo ka okpála bhende ani alo o ko. ²¹ I du me kpála bini nde apa pi yi me: <Yi tsitsia, Masiya sii!>, i

† **13:14** 13:14 Tsia bhú Dan. 9:27, 11:31, 12:11.

dɔ di-e me: <Yi tsitsia, ani abhe!>, yi azíba kpála angoo de. ²² Padhá de, anga omasiya na eu di ne opolofeta na eu agó mago. U améne ongú na ngangamba di ne okiaka 'ngú ngú napite okpála. Li angu uo kolo-o, u apíte belegu okpála li Ebhe alo o-o. ²³ La-a, ngayie, yi tsia 'kpí liyi ndjindji, anga ma agbele 'dje yi li ndu 'ngú hana kalanu.»

Nago gba Ndili gba kpála

(Tsia bhú Mat. 24:29-31; di ne bhú Luk. 21:25-28.)

²⁴ «Engú bini, li oekpí angoo, pita likabhu bhomu-o,
li ela kólo biti,
epe sú matá-a de,

²⁵ oikupala ahólo nabala kuto,

oangu inde abhúlá adyíki má djigi djigi!†

²⁶ Abhomu-o, u ú Ndili gba kpála nago bhú ndindi, ne ndu angu di ne ndu sangu gba e hana.†

²⁷ Ani atíma oandjelu li odje bili badha hana ngú napo bhúla obhende ani alo o-o, abana u dɔ bha su-oie.»

Gbitaku pindji ndula na figi

(Tsia bhú Mat. 24:32-35; di ne bhú Luk. 21:29-33.)

²⁸ «Yi kə mboli nasuno inde li ndula na figi asuno e-o. I dɔ me yi nde au me oyáyá angbongbele-o, di me okpákpá-a nde akə-o, yi de mbila me gbokokpi ibili masikpe. ²⁹ A bhadi

† **13:25** 13:24-25 Tsia bhú Isa. 13:10, 34:4; ne bhú Edj. 32:7; di ne bhú Djl. 2:10, 3:4. † **13:26** 13:26 Tsia bhú Dan. 7:13.

moko. Ngayi di-e, nedhinga yi aú engú bhomu-o ngakolo lie, yi mbila me nago gba Ndili gba kpála akolo masikpe. Aní li obhèbhoti gba yi-o. ³⁰ Ma apa pi yi na paká me, nedhinga na engú ango-o akólo makolo, me ndu okpála inde-e nde ndjia nga ndu o hana de. ³¹ Ekpi ne doto andjia mandjia. Engú bini, oeli gba ma-a adú duduma ne duduma.»

Yi lila liyi

(Tsia bhú Mat. 24:36-44.)

³² «Engú bini, ekpi di ne nedhinga li ongu bhomu-o akólo lie, kpála bini mbila de, belegu de oandjelu abhúla, belegu de Ndili-o. Ambila bha ne 'Dyi ma kpi e kpi. ³³ 'E-e! Yi alá-a de, anga yi mbila nedhinga li engú ango-o agó lie de! ³⁴ A adú maka kpála bini inde adji enú: aní a'o ká eti gba e pi obhulu kulu gba e me u du atsia 'kpi tété. Aní aha kulu namene mamene pi kpála bini ne bini. Aní aha líli pi mulila me aní alá-a de. ³⁵ Kaka-a, yi alá-a de, anga yi mbila nedhinga li bhulu eti-e agie lie lie de! Nedhinga koko adú tagolo, koko adú tutu sukpe, koko adú bhú 'gbá 'ngu na bini, koko adu kèkpi. ³⁶ Aní koto la di-e má gbilikiti-e, a ayo de me aní bhaka yi tila-a de! ³⁷ Engú inde ma ngapa e pi yi-e, ma ngapapa pi ndu okpála hana me: <Yi alá-a de!>»

14

Ongámási gba omaYuda agili nabhøle Yesu

(Tsia bhú Mat. 26:1-5; ne bhú Luk. 22:1-2; di ne bhú Dja. 11:45-53.)

¹ A adu nani 'kpí bhisi kala anokomia na Pasika , ne kala anokomia nazu mapa inde li levile nde bhú e ade-o . Ongbengbe odimandø di ne omusunu na líli gba Moidje adu agili me o hóló Yesu bhú pepe lele pi, amba o bhøø ani-e. ² U adu apa me: «A ayo de me ní holo ani bhú nedhinga na anokomia de, anga ní mene mo-o, li okpála gbé tolo.»

Ølø bini atuko mungotsi pí 'ndji Yesu

³ Yesu adu bhú kuti na Betania bhú 'ti gba Simo, bhulu kába-o. Nedhinga u adu lie nazu 'he-e, ølø bini ago ne gili inde u amene e li alabatele.* A adu bhúbhú ne tiki mungotsi na nalade.† A adu la di bhú kpéke mase. Ani agumu gili na alabatele-o, ani atsia atuko mungotsi angoo pí 'ndji Yesu. ⁴ Okpála koko a adu apa sunda o ne ke bua me: «Mungotsi inde-e ngasiti lie me-e ka ni? ⁵ U ti nako da natsitsindji ngú lí denalio ane kámá bata mane. U tsia há tia angoo pi obhulu ndibhili!» U atsia adu ake 'ngú lio pi ølø angoo.

⁶ Engú bini, Yesu apa me: «Yi 'o ani. Yi ngato mbolo li ani ngú ni? Ani amene muma bhomu-o bádha 'ngú. ⁷ Padhá de, anga ngayi-e, yi ngadu ne obhulu ndibhili ndu 'kpí hana de yi. Nedhinga yi kunda lie, yi ti da namene bádha 'ngú pi uo. Engú bini, ngama-a, ní ne yi ndu 'kpí hana ade. ⁸ Bhende ani ati nako da namene e, ani amene: ani apulu mungotsi li kute ma kalanu

* **14:3** 14:3 Alabatele: A ko teme na mase naali inde u abhobho øhe maka gili li e ko. † **14:3** 14:3 Nalade: A ko mungotsi inde u amemene e li 'kpá ulu. Tsia bhú Mat. 26:7.

ngú nazi ma ko. ⁹ Ma apa pi yi na paká me, ndu bili hana inde u akpokpo Bádha Ngali lie pílá doto libhomu-o, u akpókpo di engú ani amene e, li okpála du di abhundja ani.»

Yuda Isikaliote agili kpadji napu Yesu

(Tsia bhú Mat. 26:6-13; di ne bhú Luk. 12:1-8.)

¹⁰ Abhomu-o, Yuda Isikaliote, suka omukpata ndjikpa ne ká bhisi-e anu agba ongbengbe odi-mandè ngú napu Yesu pi uo. ¹¹ U adje engú bhomu-o lie, u akpi ndjili naali. U atsia apa me o há pi ani tia. Abhomu-o, Yuda atsia adu agili bádha nedhinga ngubula napu Yesu pi uo.

Omukpata gba Yesu anu naleke da anokomia na Pasika

(Tsia bhú Mat. 26:17-25; ne bhú Luk. 22:7-14; di ne bhú Dja. 13:21-30.)

¹² Ekpí na bini na anokomia nazu mapa inde li levile nde bhú e ade-e, ekpí u adu abholè kandolè lie ngubula Pasika-a, omukpata gba Yesu ayi ani me: «Mo okunda me ya nu leke da nazu Pasika pi mu su?» ¹³ Abhomu-o, ani atima omukpata bhisi bhú ká omukpata gba e-o. Ani atsia apa pi uo me: «Yi nu bhú gudhu, yi aké liyi ne bhoko bini inde abi lusa 'ngu, yi kpata ani. ¹⁴ Bili inde ani alí li e-e, yi de pa pi bhuhulu-o me: «Musuno apa me: tina 'ti inde mo oleke e mama ne omukpata gba ma ngú nazu Pasika tété-e ngae dho?» ¹⁵ Abhomu-o, ani asúno tina 'ti inde abhúlá-a pi yi. A ngbéngbé, u aleke ndjindji, ndu 'he hana bhúbhú bedhe. A bhomu-o bili inde yi aléke da anokomia pi ní li e ko.»

¹⁶ Omukpata-a agbida. U anu abhú gudhu. U atsia abhaka ndu 'ngú hana maka li Yesu apa pi uo lie ko. Abhomu-o, u atsia alu ezu na Pasika-o.

Yesu apa me suka omukpata bini apú ni

¹⁷ A akolo lie tagolo-o, Yesu ne omukpata gba e ndjikpa ne ká bhisi-e akolo. ¹⁸ Nedhinga u adulu lie pí misa me u nde ngazu 'he-e, Yesu atsia apa me: «Ma apa pi yi na paká me, suka yi bini, inde ngazu 'he ne ma-a, apú ma.» ¹⁹ Omukpata-a abedhe ne babuma li bua o bedhe. U atsia aholo nayi ani bini ne bini me: «A adú ma?» ²⁰ Ani apa pi uo me: «A ko suka yi omukpata ndjikpa ne ká bhisi-o, bhende i ngato 'kpa e ne ma bhú saani-o. ²¹ Ndili gba kpála akpí bha na paká maka u aye lie bhú Bhuku gba Ebhe li 'ngú gba ani-o. Engú bini, a ko likabhu pi kpála inde apú Ndili gba kpála-o. A belegu nako pi kpála ango-o ndjindji me u azú ani de!»

Yesu aha mapa ne vino pi obhulu titima gba e-o

(Tsia bhú Mat. 26:26-30; ne bhú Luk. 22:14-20; di ne bhú 1 Kol. 11:23-25.)

²² Nedhinga u adu azu 'he lie, Yesu aha mapa-o. Pipita-a, ani agie heni pi Ebhe. Ani atsia agumu bhusu bhusu, ani atsia aha pi uo. Do ani de-e: «Yi haha, a inde-e kute ma.» ²³ Pipita-a, ani aha kopo-o, pita ani agie heni lie pi Ebhe-e, ani atsia aha pi uo. U atsia andji ndu o hana. ²⁴ Ani atsia apa pi uo me: «A inde-e ngute ma, ngute na gandja inde atuko lie pi bhiti okpála-o. ²⁵ Ma apa pi yi na paká me, ma andji matá galikpe lí

ndula na vino belegu de bini, akólo li 'kpí inde ma andjí matá lie ne toto bhú Naɯ gba Ebhe-o .»

²⁶ Pita u ali 'tsi‡ lie, u aze ngú nanu pí 'ta na ondule na Olive.

Yesu apa me Piele ayála ni

(Tsia bhú Mat. 26:31-35; ne bhú Luk. 22:31-34; di ne bhú Dja. 13:36-38.)

²⁷ Abhomu-o, Yesu apa pi uo me: «Ndu yi hana, yi a'ó ká ma, anga u aye bhú Bhuku gba Ebhe-e me:

«Ma asú mɯlila gba okandɔlɔ-o,

li ongisi kandɔlɔ-o gbóngbolo ne bili ngangá.†»

²⁸ Engú bini, ma azúku lie, ma anú adjeke yi abhú Galilaya.» ²⁹ Piele atsia apa pi ani me: «Belegu li ndu okpála hana 'o ká mu-o, ngama de!»

³⁰ Yesu atsia apa pi ani me: «Ma apa pi mu na paká me, ngamu-o, sukpe na naki inde-e, kala me engu ku 'gbá bhutsibhutsi bhisi-e, mo opá bhutsibhutsi bata me ni mbila ma de.» ³¹ Engú bini, Piele atsia apa matá ne kekele me: «Abana i yo bha me ma kpi bhú dabili bini ne mu-o, ma atsé mu de!» Abhomu-o, ndu uo hana atsia apa bhadi moko.

Yesu ayo Ebhe bhú Getesemani

(Tsia bhú Mat. 26:36-46; di ne bhú Luk. 22:39-46.)

³² Pipita-a, Yesu ne omukpata gba e akolo li bili inde u a'i e me Getesemani. Ani atsia apa pi uo

‡ **14:26** 14:26 Etsi: Etsi inde si-e, a ko bhende bhú bhuku na Etsi gba omaYuda ko. OmaYuda du nani alili li 'so anokomia na Pasika. Tsia bhú Mat. 26:30. † **14:27** 14:27 Tsia bhú Dja. 13:7.

me: «Yi dũlũ kuto si, nedhinga inde ma adú lie nayo Ebhe ko.»

³³ Anĩ anũ bhú dabili bini ne Piele, Djaki ne Djaa . Abhomũ-o, tsulũ aholo anĩ, anĩ aholo azũ likabhu li bua e. ³⁴ Anĩ atsia apa pi uo me: «Bua ma abedhe ne likabhu bedhe ka ma adji akpi lie-o. Yi tigala si, yi alá-a de!»

³⁵ Pipita-a, anĩ anũ mbo tsutsu bedi. Anĩ atsia agũ 'i e bhú doto. Anĩ atsia adũ ayo Ebhe ngũbula e me i dũ me a nde alá male-e, nedhinga bhomũ-o de kodho 'kpĩ de ni tsutsu. ³⁶ Anĩ adũ apa me: «Aba, 'Dyi ma, kpéke da 'ngú pi mũ ade. 'E kópo na likabhu§ inde-e de ma ma'e! Engú bini, mo oméne maka ma akũnda lie de, mene mangbo maka mo okũnda lie ko!»

³⁷ Yesu agie lie, anĩ abhaka omũkpata gba e bata me u nde tila. Do anĩ pi Piele de-e: «Simo, mũ ngala-a? Mũ sia angu ngú nadũ ndila belegũ de ngũbula saa bini? ³⁸ Yi alá-a de, yi yo Ebhe, amba yi alĩ bhú nale de. Bua kpála dũdũ bedhe ne angu, engú bini, kute anĩ bhũbhũkũ.»

³⁹ Pipita-a, Yesu atuto matá lie mbo tsutsu masudha. Anĩ atsia ayo Ebhe ne oeli bini bhomũ. ⁴⁰ Abhomũ-o, anĩ ago matá, anĩ abhaka uo tila, anga djila uo adũ me a nde ali tili ne ela má yikpokpo! U tsia dũ nambila de me o opá pi anĩ pi-ie de. ⁴¹ Bhutsibhutsi na bata, anĩ ago. Anĩ apa pi uo me: «Yi nga bha ngala di ne naguo? A andjia, nedhinga akolo. Yi tsitsia nga, u apú Ndili gba kpála mbia inde-e pi obhũlũ siti 'ngú.»

§ 14:36 14:36 Kópo na likabhu: Bhú eli na giliki-e, u aye bha me kópo.

42 Yi yie bhúlá, ní nūnū! Yi tsitsia nga, kpála inde i ngapū ma-a, akolo!»

U aholo Yesu

(Tsia bhú Mat. 26:47-56; ne bhú Luk. 22:47-53; di ne bhú Dja. 18:3-12.)

43 Bha li nedhinga li Yesu adū ngabha lie agama 'ngú-o, Yuda, sūka obhūlū titima ndjikpa ne ká bhisi-e, akoto li uo bhú dabilī bini ne okpála inde adū sa 'kpa o ne tia 'gú: ombotia ne ondula. U ago me a nde atima uo ne ongbengbe odimandə, ne omūsuno na lílī gba Moidje di ne obhelesi okpála. 44 Yuda, kpála inde apú Yesu-o, adje lie ne uo me: «Kpála inde ma anvú pabhə e, a ko ani! Yi holo ani, amba yi nū ne ani ne nalila ani ndjindji.» 45 Nedhinga li ani akolo lie, ani atuto lie de Yesu. Ani atsia apa pī ani me: «Labi!» Ani atsia anvū pabhə ani. 46 Okpála bhe koko abu 'kpa o li ani, u atsia aholo ani.

47 Sūka okpála inde adū oo agbe mbotia gba e-o. Ani asū kpála na kulu gba bhele kpála gba odimandə-o , ani atsia akodho 'dje ani má tse!

48 Abhomū-o, Yesu atsia apa pī uo me: «Yi ago ngú ma ne ombotia di ne ondula mūgito me ma ne bhūlū 'zi! 49 Ma dū nako ndū 'kpí hana bhú ká yi bhú 'ngbé 'ti Ebhe gba omaYuda ngú nasuno, yi tsia holo ma de. Engú bini, a ko ngabula me engú inde u aye e bhú Bhuku-o mene lie.»

50 Abhomū-o, ndū omūkpa hana a'o ká ani. U atsia akpekpe. 51 Makombi bini adū akpata Yesu me ani nde abuku kute e bha ne mbūlū daladeli. U aholo ani. 52 Engú bini, ngaani-e, ani

abala 'kpa li daladeli-o, ani atsia ayiki lie ne holo ndumbu.

U anu ne Yesu kala Libi okpála natsia 'kpí li 'ngú gba omaYuda

(Tsia bhú Mat. 26:57-68; ne bhú Luk. 22:54-55, 63-71; di ne bhú Dja. 18:13-14, 19-24.)

⁵³ Abhomu-o, u anu ne Yesu kala bhele kpála gba odimandø-o. U atsia apo bhúla o ndu o hana: ongbengbe odimandø, obhelesi okpála di ne omusuno na líli gba Moidje. ⁵⁴ Piele adu akpata Yesu mbo tsutsu. Ani atsia akolo bhú mbadhasu gba bhele kpála gba odimandø-o. Ani adu kuto, ani atsia adu atu djua bhú dabili bini ne omulila.

⁵⁵ La-a, ongbengbe odimandø bhú dabili bini ne Libi okpála natsia 'kpí li 'ngú gba omaYuda adu naao agili kpála inde agó apa 'ngú li kute Yesu sisiti, amba o kodho 'ngú gba ani-e me ani kpi. Engú bini, u u de. ⁵⁶ Okpála bhelé adu apa 'ngú li Yesu ne eu. Engú bini, ongu u adu apa e, a go li kpadji bini de. ⁵⁷ Okpála bini bini adu ayie bhúla ne napa 'ngú li ani ne eu me: ⁵⁸ «Ya adje ani me ani nde ngapa me: <Ngama-a, ma abhéle 'ti Ebhe inde li okpála amene e inde. Pita 'kpí bata, ma tsia yiki koko inde li 'kpa kpála mene e de.» ⁵⁹ Engú bini, abana u adu apa lie mo-o, u du adje lio bhú nakpokpo 'ngú angoo de.

⁶⁰ Abhomu-o, bhele kpála gba odimandø-o ayie bhúla bhú ká okpála-o. Ani atsia ayi Yesu me: «Mu gie 'ngú li kute engú u ngakpokpo e li mu-o di?» ⁶¹ Engú bini, ngaani-e, ani andjili bha má bulu, ani gie engú bini de! Bhele kpála

gba odimandø-o atsia ayi matá ani me: «Mũ ne Masiya , Ndili gba Ebhe inde li okpála ngadhøø e?» ⁶² Yesu agie me: «A moko, ma ne ani. Yi aú Ndili gba kpála adũ li pápá na kokpa gba Angbamili me ani nde ngago ne ndindi na abhúlá.†»

⁶³ Abhomũ-o, bhele kpála gba odimandø-o asidha bongo gba e. Ani atsia apa me: «Ní matá ne gumũ okpála koko ngú nakpokpo 'ngú gba ni-e ade! ⁶⁴ Yi adje maka ani asobho Ebhe lie adje. Yi apa tété pi?» Abhomũ-o, ndũ uo hana akodho 'ngú gba ani-e me ani ati ne nakpi. ⁶⁵ Bini bini bhú ká uo aholo aku ngusũ li ani. U atsia adũ di abuku bhúla ani, asũ ani ne napa pi ani me: «Pa pi ya me asũ mũ da!» Omũlila-a aha ani, u atsia aholo di nasũ ani.

Piele apa me ni mbila Yesu de

(Tsia bhú Mat. 26:69-75; ne bhú Luk. 22:56-62; di ne bhú Dja. 18:15-18, 25-27.)

⁶⁶ Nedhinga li Piele adũ nga bha lie tũ mbadhasũ-o, saka okpála na kulu bini na øøø gba bhele kpála gba odimandø ago. ⁶⁷ Ani au Piele lie ngatũ djua-a, ani atsia ani má sũũ! Ani atsia apa pi ani me: «Ngamũ di-e, mo odu nako bhú dabili bini ne Yesu, kpála na Nadjaleta-o!» ⁶⁸ Engú bini, Piele ayaya. Ani atsia apa me: «Ma mbila de. Ma kø di mboli engú mũ ngakũnda napa e de.» Abhomũ-o, ani akoto kilidjo bhú mbaladja. [Pipita-a, engũ atsia aku 'gbá.]

† **14:62** 14:62 Tsia bhú Ets. 110:1; di ne bhú Dan. 7:13.

69 Engú bini, kpála na kulu na øøø ango-o au aní. Aní atsia apa matá bhú djila okpála inde adu oo me: «Kpála inde aoo, a ko di sùka uo!» 70 La-a, Piele ayaya matá. Pita nedhinga masudha, okpála inde adulu oo apa matá pi Piele me: «A ko paká, mu ne sùka uo, anga ngamu di-e mu ne kpála na Galilaya.» 71 Engú bini ngaani-e, aní aholo natu silika ne nasima me: «Ma mbila kpála inde yi ngapa 'ngú gba e muma bhomu-o de!» 72 Má gala kolo me-e, engu atsia aku 'gbá bhutsibhutsi na bhisi. Abhomu-o, Piele abhundja engú inde li Yesu apa igini e pi aní me: «Kala me engu ku 'gbá bhutsibhutsi bhisi-e, mo opá bhutsibhutsi bata me ni mbila ma de.» Aní atsia akoto ne holo ne naku 'gbá.

15

U anu ne Yesu kala Pilato
(Tsia bhú Mat. 27:1-2, 11-14; ne bhú Luk. 23:1-5; di ne bhú Dja. 18:28-38.)

1 Kèkpí má bhø, ongbengbe odimandø gba Ebhe-e apo bhúla o bhú bula. U adu bhú dabili bini ne obhelesi okpála, ne omusuno na líli gba Moidje , la di ne Libi okpála natsia 'kpí li 'ngú gba omaYuda libhому. U agbite Yesu ne ekpu, u anu ne aní, u atsia aha aní pi Pilatø. 2 Pilatø ayi aní me: «Mu ne 'ngbé ngámá gba omaYuda?» Yesu agie pi aní me: «Mu ngapapa ngamu.» 3 Ongbengbe odimandø adu apa osisiti 'ngú bhelé li kute aní. 4 Abhomu-o, Pilatø atsia ayi matá aní me: «Ndu 'ngú inde u ngapa e li kute mu inde-e, mu gie 'ngú tété bini di?» 5 Engú

bini, Yesu gie 'ngú tété belegu de bini. Kaka-a, Pilatø angamba naali.

U akodho 'ngú gba Yesu me ani kpi bha makpi (Tsia bhú Mat. 27:15-26; ne bhú Luk. 23:13-25; di ne bhú Dja. 18:39 - 19:16.)

⁶ Bhú ndu anokomia na Pasika hana, a ayo me Pilatø tse 'kpa li kpála bini inde u aholo e bhú tikpu-o pi omaYuda. A ayo me a adu bhende li okpála ayó me Pilatø tse 'kpa li e ko. ⁷ A abhaka me kpála bini inde u a'i e me Balabasi nde bhú tikpu. A adu me u nde aholo ani bhú dabili bini ne okpála na kpekpeke 'ndji me u nde abhølo kpála bini bhú nedhinga u agbe kpéke 'ndji lie-o. ⁸ Abhomu-o, bhiti okpála anu abhaka Pilatø, u atsia aholo nayo me Pilatø mene pi o maka ani amemene lie gøme gøme-o.

⁹ Pilatø agie pi uo me: «Yi akunda me ma tse 'kpa li 'ngbé ngámá gba omaYuda pi yi?» ¹⁰ Padhá de, anga ani adu ambila ndjindji me ongbengbe odimandø apu Yesu, anga okpála adu ne mukunda naali pi Yesu. ¹¹ Abhomu-o, ongbengbe odimandø atsia ato bhú okpála bhelé me u yo me Pilatø tse mangbo 'kpa li Balabasi. ¹² Pilatø atsia ayi bha matá uo me: «A ayo la me ma mene ngú kpála bhende yi nga'i e me 'ngbé ngámá gba omaYuda-a pi?» ¹³ Okpála bhomu-o atsia agie ne nasusula me: «Gi ani li kulusi!» ¹⁴ Pilatø atsia adu ayi uo me: «Ani amene la mangua siti 'ngú dho?» U asusula matá kpekpeke naali ne na'e'e 'li o ne abhúlá me: «Gi ani li kulusi!» ¹⁵ Abhomu-o, Pilatø atse 'kpa li

Balabasi pi uo, amba ni atsógbolo bua uo de. Ani aha líli me u bhi Yesu ne fimbo, pipita-a, ani atsia aha ani pi uo me u gi ani li kulusi gigi.

Osudha amu Yesu

(Tsia bhú Mat. 27:27-31; di ne bhú Dja. 19:2-3.)

¹⁶ Abhomu-o, osudha aha Yesu, u atsia anu ne ani tu mbadhasu gba Pilato. U a'i ndu osudha koko hana. ¹⁷ U ato bongo na zumbe zumbe li kute ani, u atsia agala ehe na eti má kilili, u aha-a, a ato bhú 'ndji ani. ¹⁸ U atsia aholo nayi ani me: «'Ngbé ngámá gba omaYuda, atou!» ¹⁹ U adu abhi 'ndji ani ne mbamba, u atsia adu aku ngusu li kute ani. U atutu lipuku o kuto, u atsia adu ati kala ani. ²⁰ Pita u amu ani lie má tsiki tsiki-e, u agbe bongo na zumbe zumbe-e li kute ani, u atsia agie obongo gba ani-e pi ani. Pipita-a, u atsia agbe ani kilidjo ngubula nagi ani li kulusi.

U agi Yesu li kulusi

(Tsia bhú Mat. 27:32-44; ne bhú Luk. 23:26-43; di ne bhú Dja. 19:17-27.)

²¹ Abhomu-o, osudha aholo kpála bini ne kpéke me ani bi kulusi gba Yesu-o. A adu 'li kpála ango-o me Simo, a adu 'dyi Alekidjandele ngauo ne Lufusi. A adu kpála na gudhu na Silene. U aholo ani me ani nde ngakodho 'kpi oo nedhinga ani adu agie lie lie abhiye-o. ²² U anu ne Yesu li bili inde u a'i e me Gologota, (a akunda napa me «bili na pelege 'ndji»). ²³ U adu akunda naha vino inde u akpetse e ne mila pi ani. Engú bini, Yesu ndji de.

²⁴ U agi ani li kulusi. U agbogbo bhusu o li obongo gba ani-e me u nde agu ngaiza tété

gbanda ngú nambila bhende a ayo me kpála bini ne bini sia e ko. ²⁵ U agi Yesu li kulusi bhú saa na odukpabini kala tulukpe. ²⁶ Balua inde u aye e ngú nasuno ta mangimbo gba ani-e aye nani lie me: «'NGBÉ NGÁMÁ GBA OMAÝUDA.» ²⁷ U atsia agi la di bhú dabili bini ne ani-e, obhulú 'zi bhisi inde adu agbulú 'he gba okpála ne kpéke. Bini adu li kulusi gba e li pá 'kpa ani na kokpa. Koko atsia adu li kulusi gba e li pá 'kpa ani na gali. [²⁸ Abhomu-o, eli gba Ebhe inde aye lie bhú Bhuku gba ani-e me: «U ato 'li ani bhú ká okpála na sisiti-e†», atsia amene lie.]

²⁹ Okpála inde adu akodho 'kpí oo adu asosobho ani. U adu ako 'ndji o, u atsia adu apa me: «He-e! Ngamu, kpála inde abhólò 'ngbé 'ti Ebhe gba omaÝuda, i tsia yiki sunda 'kpí bata-a, ³⁰ kobho limu ngamu makpe, amba mu yie li kulusi-e kò kuto.»

³¹ Ongbengbe odimandò gba Ebhe di ne omusuno na líli gba Moidje adu bhadi namu ani moko. U adu apa sunda o me: «Ani akobho okpála koko, ani ti da nakobho lie ngae makpe di! ³² Mbia inde-e, a ayo me Masiya , 'ngbé ngámá gba omafsalaele yie li kulusi, ya u, amba ya bhuka.» Obhende u agi o ne li okulusi gba o dengo ani-e adu bhadi namu ani moko.

Yesu akpi

(Tsia bhú Mat. 27:45-56; ne bhú Luk. 23:44-49; di ne bhú Dja. 19:28-30.)

³³ Tulukpe-e, biti akò pí doto libhomu, nakolo pi saa na bata pita tulukpe. ³⁴ Abhomu-o, bhú

† 15:28 15:28 Tsia bhú fsa. 53:12.

saa na bata-a, Yesu asula kpekpeke me: «Eloi, Eloi, lama sabakatani?» (A akunda napa me, «Ebhe gba ma, Ebhe gba ma, mo o'o ká ma ka ni?»)[†] ³⁵ Bini bini bhú ká okpála inde adu oo adje ani lie, u atsia apa me: «Yi djedje, ani nga'i Eliya!» ³⁶ Suka kpála bini agu holo. Ani anu azi epondje bhú kpongadha pandi. Ani agbite li kute mbamba. Ani atsia aha pi ani me ani ndji ne napa pi obi e me: «Ayó nga! Ní tsia nga ne me Eliya agó ngú nako ani li kulusi-e kuto.» ³⁷ Engú bini, Yesu asula kpekpeke. Ani atsia akpi.

³⁸ Abhomu-o, lido* inde adu agbo bhusu 'ngbé 'ti Ebhe-e asidha bhusu e bhisi má tsue nayie abhúlá, akolo akuto! ³⁹ Ngámá gba osudha kámá bini inde adu bhúla ani au lele maka ani akpi lie, ani atsia apa me: «Kpála inde-e bha ndju nako ne ndili gba Ebhe kukulu!»

⁴⁰ Olisi bini bini adu di oo. U adu atsia 'ngú bhomu-o mbo tsutsu. Bhú ká uo-o, a adu nani Malia , kpála na gudhu na Magadala, Malia , 'hi Djodje ngauo ne Djaki bhe na makombi makombi-o, a la di-e Salome. ⁴¹ Nedhinga li Yesu adu lie bhú Galilaya-a, olisi bhomu-o adu adhuku bhú dabili bini ne ani. U atsia adu di ateteke ani. Olisi koko bhelé inde ayie nani ne ani bhú Yelusalema adu di oo.

Djodjefu azi Yesu

(Tsia bhú Mat. 27:57-61; ne bhú Luk. 23:50-56;

[†] **15:34** 15:34 Tsia bhú Ets. 22:2. * **15:38** 15:38 'Ngbé 'kpá bongo inde si-e, adu nani agbo bhusu tina 'ti na bubu-o, ne bhende na bubu naali bhú 'ngbé 'ti Ebhe gba omaYuda ko. Tsia bhú Eki. 26:31-33, ne bhú Luk. 23:45, di ne bhú Ebe. 6:19.

di ne bhú Dja. 19:38-42.)

⁴² A adu ibili tagolo. A abhaka la lie me a nde ekpí naleke lio ngú anokomia-a, a akunda napa me ekpí kala ekpí naguo gba omaYuda-a , ⁴³ suka okpála na Libi okpála natsia 'kpí li 'ngú gba omaYuda ago. A adu 'li ani me Djodjefu , kpála na gudhu na Alimatayo. A adu kpála nakpe makpe. Ani adu di adjeke Nau gba Ebhe-o . Ani atsia asia kpéke bua ngú nali agba Pilatè ngú nanu ayo kuo Yesu. ⁴⁴ Pilatè angamba naali nadje me Yesu akpi kolo akpi-o. Abhomu-o, ani a'i ngámá gba osudha-o. Ani atsia ayi ani me ani akpi igini bhutode i-e. ⁴⁵ Pita nagie 'ngú tété ka ngámá gba osudha-a, Pilatè aziba pi Djodjefu naha kuo Yesu. ⁴⁶ Abhomu-o, Djodjefu akala daladeli inde u amene e li lene. Ani akè kuo Yesu li kulusi-e kuto. Ani atsia agagala ne daladeli bhomu. Ani anu a'o bhú lata inde adu me u nde adji e bhú teme-o. Ani awawala 'ngbé teme li bhøbhø. ⁴⁷ Malia, kpála na gudhu na Magadala ngauo ne Malia, 'hi Djodje adu atsia bili u a'o ani li e-o.

16

Yesu azuku

(Tsia bhú Mat. 28:1-8; ne bhú Luk. 24:1-12; di ne bhú Dja. 20:1-20.)

¹ Li ekpí naguo gba omaYuda akodho 'kpí lie, Malia , kpála na gudhu na Magadala, ne Malia , 'hi Djaki, bhú dabili bini ne Salome, akala emu inde bhú e ne mungotsi ngú nanu apulu kute kuo Yesu ne di. ² Abhomu-o, bhú 'kpí yinga kèkpí má

bhó-o, nedhinga li ela adu akoto lie, u anu abhú lata. ³ U adu apa sunda o me: «A atumba teme inde li 'bhø lata-a pi ní da?» ⁴ Engú bini, u atsia 'kpí lie me-e, u au me teme bhomu-o atumba lie atumba. Abana a adu lie ngbéngbé.

⁵ U ali lie bhú lata-a, u au makombi bini ato 'ndjá yambu na bubu me ani nde adu li pápá na kokpa. U atsia adje tsulu naali. ⁶ Engú bini, makombi bhomu-o apa pi uo me: «Yi adjé tsulu de. Yi ngagili Yesu, kpála na Nadjaleta, inde u agi nako e li kulusi-o. Ani azuku. Ani sii ade. Yi tsia nga bili nako u a'o ani li e-o. ⁷ Yi nu pa mangbo pi omukpata gba ani di ne Piele me: «Ani akodho 'kpí pi yi bhú Galilaya kalanu. Yi aú ani oo maka ani apa nako pi yi lie ko.» ⁸ Abhomu-o, u aze bhú lata-a ne holo kilidjo, anga mabhundja gba uo angbingi, kate uo atsia adu aguku. U tsia pa pi kpála de, anga u adu ne tsulu.

Yesu akoto li Malia, kpála na gudhu na Magadala
(*Tsia bhú Mat. 28:9-10; di ne bhú Dja. 20:11-18.*)

[⁹ Li Yesu azuku lie bhú 'kpí yinga kekpi-e, ani akoto ngaiza li Malia, kpála na gudhu na Magadala, inde ani apandja nani osisiti bua mananika bhú e-o.* ¹⁰ Malia anu napapa pi okpála inde adu nani bhú dabili bini ne Yesu-o. U adu ne likabhu, u atsia adu di aku 'gbá. ¹¹ Engú bini, li okpála bhomu-o adje lie me ani nu, di ne me Malia au ani-e, u bhuka ani de.

* **16:9** 16:9 Ongú nayie si akólo bhú 16:20, a bhú obhuku koko na didili-e ade.

*Yesu akoto li omukpata bhisi
(Tsia bhú Luk. 24:13-35.)*

¹² Pipita-a, Yesu asuno matá lie maka kpála koko pi omukpata bhisi inde adu li kpadji ngú nanu akuti-o. ¹³ Abhomu-o, obhobhomu-o ago apa pi okoko-o. Engú bini, okoko bhuka uo de.

*Yesu asuno lie pi omukpata ndjikpa ne ká bini
(Tsia bhú Mat. 28:16-20; ne bhú Luk. 24:36-49;
ne bhú Dja. 20:19-23; di ne bhú Kul. 1:6-8.)*

¹⁴ Li soso-o, Yesu atsia asuno lie pi obhulu titima gba e ndjikpa ne ká bini-e me u nde ngazu 'he. Abhomu-o, ani atsia agbele 'dje uo ka ndi nabhuka di ne kpéke 'ndji gba uo-o. Padhá de, anga u bhuka nani okpála inde au ani me ani nde azuku-o de. ¹⁵ Abhomu-o, ani atsia apa pi uo me: «Yi nu píla doto libhomu nakpokpo Bádha Ngali pi ndu okpála hana. ¹⁶ Kpála inde abhúka-a, inde asía la di batisimo-o, ani kóbho. Kpála bhende i bhúka de-e, asía mangimbo. ¹⁷ A inde-e ongú inde adhúku bhú dabili bini ne obhende abhúka-o: u apándja osisiti bua bhú okpála ne 'li ma, u agáma 'ngú bhú odikongu na mbia. ¹⁸ U ahólo okpulu ne 'kpa o. I du di me u nde andji elá na bhøle kpála-a, a améne 'he bini ngú uo de. U a'ó 'kpa o pí 'ndji okpála na kuo, li okpála na kuo ango-o kóbho.»

¹⁹ Pita napa ongú bhomu-o pi uo-o, Ebhe aha Ngámá Yesu abhúlá. Ani atsia adu kuto li pá 'kpa Ebhe na kokpa. ²⁰ Abhomu-o, omukpata-a atsia anu naao nakpokpo Bádha Ngali ne ndu bili hana. Ngámá adu ateteke uo bhú okulu bhomu-o

hana. Ongamba 'ngú inde u adu amene e adu di
asuno me nasuno inde u ngasuno e-e, a ko 'ngú
na paká.]

Gandja na Mbia
Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 3 Mar 2023 from source files
dated 29 Jan 2022

6b4904fb-f8ce-5931-8218-7cee8914232c